

## **Vali Nama'ina IOANE Eleleia Kauna**

### *Puka Laloana Ielena Luvana*

Vali nama'ina kanania Ioane eleleia laloanai evaikata, Iesu 'eva Dilava ena luva keinikeini kauna, ia 'eva kau kauaninai easi maivaka kau viloatai emia (1.14). Ioane ena ula 'eva kau Iesu beabivenia ia 'eva Dilava Nakuna, bekabasi Iesu 'eva Dilava eluva'ana'i besinia be'asi bevamaulita kauna. Ioane 'eva eikabasi kau Iesu deabivenia kauta 'eva mauili keinikeini dedavalia, kanaua 'ounai kanania eleleia (20.31).

Lava'ana'ina 'eva Ioane e'outa Iesu 'eva Dilava ena Luva, inoku vatabulovo vinalata evavai lovana eaku. Luva umauna, kau vaida 'eva Iesu deabivenia mai mulinai deda'a, beiamo vaida 'eva ia iabivenina sia deula. Puka elena 13 – 17 laloanai ivaiivivina kauta dalana dekadu iabi'inina lovana eaku, Iesu 'eva ibanona kauta ita demia, ia eta'u vaikabasi mediata evenita. To'onai 'eva Iesu bai eko'isi 'udai mai ibanona kauta ia deikaia mai deabi venia.

Dava ka'onamo puka kanania laloanai eka ikala basibasi 'eva ena koakoa kanaua kau eta mauili laloanai davata eabita luva ivavitaitatai evaaota abiveni kauta melala boutai bemaui vaita, itani vei, palaoa, 'ailala, vine vuana, mamoe mai i'imana kauna luvata.

### *Puka Iduvuna Namata*

- a. Luva lava'ana'ina. (1.1 - 18)
- b. Ioane vaidi'u kabukabu kauna mai Iesu ibanona kauta lava'ana'ita. (1.19 - 51)
- c. Iesu ena vinala kau kevatai. (2.1 – 12.50)

- d. Melala to'otai Ielusalema laloanai mai kevanai. (13.1 – 19.42)
- e. Lovia namamna ena ko'isi 'udai mai evaila. (20.1 - 31)
- f. Luva to'onai ela'asi mo Kalilea laloanai. (21.1 - 25)

*Luva 'Eva Kau Kauaninai Easi.*

<sup>1</sup> Makavana umaunai kanobata asido'o epulu laloanai Luva 'eva 'ani ua'i, Luva 'eva Keliso, Luva 'eva Dilava ita demia, mai Luva 'eva Dilava.

<sup>2</sup> Ia 'eva makavana umaunai Dilava ita demia.

<sup>3</sup> Dilava evavaita davata boutai 'eva Luva kanaua'i depulu, depulu davata boutai 'eva sia ka sibona epulu.

<sup>4</sup> Luva 'eva maui 'olana, inoku maui kanaua 'eva kau 'ailala evenita.

<sup>5</sup> 'Ailala 'eva vabuto'o laloanai e'ani, beia vabuto'o 'eva 'ailala sia evabo'oa.

<sup>6</sup> Dilava kau ka esinia easi, ia vana 'eva Ioane.

<sup>7</sup> Ia enai kau boutai 'ailala valina be'ika inoku bevamomo'aia 'ounai ia easi kau kevatai 'ailala beluva vaia kanaua'i kau boutai ia enai bema abivenia.

<sup>8</sup> Ia sibona 'eva sia 'ailala kanaua, beia 'ailala valina bekakava 'ounai easi.

<sup>9</sup> 'Ailala umauna 'eva easi kanobatai kau boutai beva'ailalata.

<sup>10</sup> Luva 'eva kanobatai, inoku kanobata 'eva ia enai ivavaina, beia kanobata kauta 'eva ia sia deikabasia.

<sup>11</sup> Ia easi ena kanobata umauna, beia ia ena kanobata kauta umauta 'eva ia sia deabia dae.

<sup>12</sup> Beia kau vaidia ia deabia dae, mai vana deabivenia kauta kataua boutai 'eva ia komolo evenita Dilava nakunai be'ao.

<sup>13</sup> Dilava nakunai deao kauta 'eva sia kau eta pulu dalanai, 'o sia kauani ena ulai, 'o sia kau ka ena ulai, beia Dilava ena ulai depulu.

<sup>14</sup> Luva kanaua 'eva kau kauaninai easi, viloamaiai ita lai amia. Ena nuavi lai aikaia, nuavina kanaua 'eva Kamana kevanai easi Nakuna ka'onamo enai, iulaveni mai luva umaunai evonuvonu 'au.

<sup>15</sup> Ioane eta'u ia valina ekava 'eva evaoi ediaka, “Lau valina akava kauna 'eva kanania, adiaka, ‘Lau muli'uai e'asi kauna 'eva ekeini'u 'olana ia emia makava vakaia lau apulu.’”

<sup>16</sup> Ia iulaveniai evonuvonu dae ai 'eva ita boutai melala ka ka laloatai vanama'ina kabi 'udai abi 'udai.

<sup>17</sup> Dilava 'eva talavatu Mose enai evenita, beia iulaveni mai luva umauna 'eva Iesu Keliso enai deasi.

<sup>18</sup> Sia kau ka Dilava eikaia kovo, beia Nakuna ka'onamo mo sibona, Dilava kevana umauna emimia mai ia sibona vaka Dilava, ia eta'u Dilava ita evaikata.

*Vaidi'u Kabukabu Kauna  
Ioane Eilolo.*

*(Mt 3.1-12; Mk 1.1-8; Lk 3.1-18)*

<sup>19</sup> Inoku Ielusalemai Iuda kauta namata deta'u kabukabu kauta mai Levi kauta desinita deda'a Ioane belavuaia ia 'eva dai.

<sup>20</sup> Ioane sia e'ou avuavu beia e'ou dae ediaka, “Lau 'eva sia Keliso.”

<sup>21</sup> Ia delavuaia dediaka, “Inoku oni 'eva dai? Oni Elia?” Ia ediaka, “Lau sia Elia.” Ia delavuaia 'udai dediaka, “Oni enolea kaumu, una?” Ia eta luva evamuea ediaka, “Asi'i.”

<sup>22</sup> Kanaua 'ounai ia de'ouia dediaka, “Inoku 'oumai oni 'eva dai. Emu nu'ovi lai babi muea

bada'a desinimai kauta lai ba'outa. Oni sibomu a oluva vaimu koma?"

<sup>23</sup> Ioane eta luva evamuea ediaka, "Lau 'eva enolea kauna Isaia ena lelelele luvana, ia eluva ediaka, 'Lele ka kano'akunai evaoi ediaka,

Lovia namana ena dala ovakomoloa.' "

Isa 40.3

<sup>24</sup> Palisea kauta vaidia vaka desinita,

<sup>25</sup> delavuaia dediaka, "Bema oni sia Keliso, 'o sia Elia, 'o sia enolea kaumu koanai dava 'ounai ovaide'u kabukabu?"

<sup>26</sup> Ioane e'outa ediaka, "Lau veiai avaidi'u kabukabu, beia oi sia oikabasia kauna ka oi viloa-muai elalava.

<sup>27</sup> Ia 'eva lau muli'uai e'asi, beia ia lau ekeini'u, lau 'eva sia anama'ina ia ena tamaka valota baluvuta."

<sup>28</sup> Katania boutai 'eva Betaniai, Iolidana nutu avekenai Ioane evaidi'u kabukabu laloanai depulu.

### *Iesu 'Eva Dilava Ena Mamoe Nakuna.*

<sup>29</sup> Elani Ioane 'eva Iesu eikaia ia kokona easi inoku e'outa ediaka, "Oikaia, Dilava ena mamoe nakuna kanobata ena si'avana iabina ovo kauna.

<sup>30</sup> Ualavi lau lovana aku kauna kanania, adiaka, 'Muli'uai e'asi kauna 'eva lau ekeini'u, 'olana ia emia makava vakaia lau apulu.'

<sup>31</sup> Lau sibo'u ia sia aikabasia, beia lau asi veiai bavaidi'u kabukabu 'eva ia bavala'asia Isalaela kauta ia beikabasia 'ounai."

<sup>32</sup> Inoku Ioane ia valina ekava ediaka, "Lau Idume Kabukabuna aikaia boiomalo boina vutuvutuai e'ovu ia akanai esili'au.

<sup>33</sup> Lau asido'o ia aikabasia, beia esini'u veiai bavaidi'u kabukabu kauna eta'u e'ou'u ediaka, 'Idume Kabukabuna be'ovu boikala inoku kau ka akanai besili'au kauna boikabasi ia 'eva Idume Kabukabunai bevaidi'u kabukabu.'

<sup>34</sup> Lau maka'uai 'ani aikaia inoku a'ou dae kania 'eva Dilava Nakuna."

*Iesu Ibanona Kauta Lava'ana'ita.*

<sup>35</sup> Elani Ioane mune'e ua'i ibanona kauta lua ita delava.

<sup>36</sup> Ia Iesu eda'a keini eikaia koanai ediaka, "Oikaia, Dilava ena mamoe nakuna."

<sup>37</sup> Ioane ibanona kauta lua ia eluva lelana deika koanai deda'a Iesu mulinai deda'a.

<sup>38</sup> Iesu ekai 'udai mulinai deda'a eikata inoku elavuaia ediaka, "Oi o'ula dava?" Ia ena luva devamuea dediaka, "Labi e, oni a'i omimia?" (Leletai Labi anina 'eva Vaikabasi kauna.)

<sup>39</sup> Ia e'outa ediaka, "Omai oikaia." Inoku deda'a ena mia 'abuna deikaia, 'ani elavilavi melala koana vani 'ounai ia ita demia.

<sup>40</sup> Kau luana Ioane eluva lelana deika inoku Iesu mulinai deda'a kauta ka 'eva Andelea, ia 'eva Simona Petelo kadina.

<sup>41</sup> Andelea komolonai 'a'ana Simona edavaliala inoku e'ouia ediaka, "Lai Mesaia 'ani lai adavaliala." (Mesaia anina 'eva Keliso, Vamauli kauna.)

<sup>42</sup> Inoku ia Simona evuaia deda'a Iesu kevana. Iesu Simona eteia basibasi inoku ediaka, "Oni 'eva Simona, Ioane nakuna, vali'u oni vamu be'aea Kepa." (Kepa 'eva vitaitana Petelo, anina 'eva bika'a.)

*Iesu Pilipo Mai Natanaela E'aeta.*

<sup>43</sup> Elani Iesu eula beda'a Kalilea laloanai, Pilipo edavaliala inoku e'ouia ediaka, "Muli'uai mai."

<sup>44</sup> Pilipo 'eva Betesaida kauna, Andelea mai Petelo eta vanua kauna.

<sup>45</sup> Pilipo eta'u Natanaela edavalia inoku e'ouia ediaka, “Mose talavatu laloanai valina ekava maivaka enolea kauta eta pukai deleleia kauna 'ani lai adavalia. Ia 'eva Nasaleta kauna Iesu, Iosepa nakuna.”

<sup>46</sup> Natanaela elavuai ediaka, “Nasaleta ai dava nama'ina ka ua'i bepupulu bedaia, una?” Pilipo ediaka, “Oni mai ikala.”

<sup>47</sup> Iesu Natanaela eikaia kokona easi koanai luvana eluva ediaka, “Ia 'eva Isalaela kauna umauna. Ia nuanai 'eva sia dede koana ka.”

<sup>48</sup> Natanaela ia elavuaia, “Lau aboina oik-abasi'u?” Iesu ia ena luva evamuea ediaka, “Oni suke auna venunai do'o laloanai aikamu vakaia mulinai Pilipo e'aemu.”

<sup>49</sup> Inoku Natanaela enu'ovi ediaka, “Vaikabasi kaumu e, oni 'eva Dilava Nakuna. Oni 'eva Isalaela eta Lovia 'olana.”

<sup>50</sup> Iesu ia e'ouia ediaka, “Oni ovamomo'ai 'olana adiaka suke auna venunai aikamu 'ounai, una? Sia kanania mo, vailai oni 'eva dava namata boikata.”

<sup>51</sup> Mune'e ediaka, “Lau oi luva umauna a'oumui, vutuvutu beluluvu, inoku Dilava ena anelu Lau Kau Nakuna aka'uai bele'au be'ovu oi boikata.”

## 2

### *Kana Vanuanai Kamoane Naduna Ka.*

<sup>1</sup> Melala lua deole mulinai Kalilea laloanai Kana vanuanai kamoane naduna ka epulu. Iesu sinana 'eva ua'i,

<sup>2</sup> Iesu mai ibanona kauta ita vaka deveauta deda'a kamoane naduna kanaua'i.

<sup>3</sup> Nadu laloanai vine veina bounai deinu palua koanai Iesu sinana eta'u Iesu e'ouia ediaka, "Ia eta vine veina 'ani eole."

<sup>4</sup> Iesu ediaka, "Sina'u e, dava 'ounai eta bavunu davana lau oveni'u? Lau e'u melala asido'o edaia."

<sup>5</sup> Ia sinana da'alaabi kauta e'outa ediaka, "Ia be'oumui davata boutai oi bovavai."

<sup>6</sup> Ua'i bika'a voduta namata kalakoi delava, Iuda kauta eta koakoa daitai vodu kataua'i vei be'adoisi imata mai aeta bedeini, vodu namata ka ka laloatai itani vodu kikita luanavui 'o koinavui boita vakaia belaivonu.

<sup>7</sup> Iesu da'alaabi kauta e'outa ediaka, "Vodu vei ai olai vonuta." Inoku delai vonuta eda'amo bibi'atai.

<sup>8</sup> Inoku ia e'outa ediaka, "Vali'u vei vitalua o'adoisi, oabi oda'a nadu ikakaona kauna ovenia." Inoku vitalua de'ado deda'a ia devenia.

<sup>9</sup> Nadu eikaiakao kauna vine veinai eao veina kanaua einuia kovo, ia sia eikabasi a'i easi, da'alaabi kauta vei de'ado kauta sibota mo deikabasi. Inoku nadu eikaiakao kauna kamoane makamaka kauna e'aeia tau,

<sup>10</sup> e'ouia ediaka, "Kau boutai 'eva vine veina nama'ina devenita makava, inoku da'a'au kauta deinu ba mulinai vine veina veaveana devenita, beia oni 'eva vine veina nama'ina ovamaua easimo vali'u oveveni."

<sup>11</sup> Iesu vatabulovo koana lava'ana'ina kanania evavaia Kalilea laloanai Kana vanuanai. Ena nuavi evala'asia inoku ibanona kauta ia deabivenia.

<sup>12</sup> Nadu kanaua mulinai Iesu, ia sinana, kadina mai ibanona kauta ita deda'a Kapelanauma, boni vida mo ua'i demia.

*Iesu Tavatava Kauta Lo'e Kabukabunai Elo'ota Asi.*

*(Mt 21.12, 13; Mk 11.15-17; Lk 19.45, 46)*

<sup>13</sup> Iuda kauta eta La'au keini naduna melalana ekevai 'ounai Iesu ele'au eda'a Ielusalema.

<sup>14</sup> Lo'e kabukabuna laloanai 'eva bolomakau, mamoe mai boiomalo detavatava vaita kauta mai moni deabivai'ade kauta eta vakai demia eikata.

<sup>15</sup> Kanaua 'ounai 'onau ai 'odi'odi davana ka evavaia, inoku lo'e kabukabuna laloanai kau boutai maibolomakauta mai maimamoeta ita elo'ota asi, moni deabivai'ade kauta eta moni epovuta siusiu inoku eta vaka evaakuta keini.

<sup>16</sup> Boiomalo detavatava vaita kauta kataua e'outa ediaka, “Dava katania 'abu kanania'i oabita tau. Kama'u ena luma 'eva sia emui tavatava 'abunai oi bovaaoa!”

<sup>17</sup> Inoku ibanona kauta Puka kabukabunai 'ani ilelena luvana delaloia une, “Oni emu luma ilalo'au venina 'eva 'alova boina lau nua'uai e'ani.”

<sup>18</sup> Inoku Iuda kauta namata deta'u Iesu delavuaia dediaka, “Vatabulovo koana davana lai bovaikamai 'eva lai bavamomo'aimu oni maiemu siavu dava katania boutai ovavai?”

<sup>19</sup> Iesu eta luva evamuea ediaka, “Lo'e kabukabuna kanania oi bosiu, lau melala koi laloanai bavalavala 'udai.”

<sup>20</sup> Iuda kauta namata deluva dediaka, “Lo'e kabukabuna kanania 'eva vikau vaninavui kalakoi (46) devavaia, beia oni melala koi laloanai bovalavala 'udai okoma, una?”

<sup>21</sup> Beia Iesu lo'e kabukabuna lovana eakuia davana 'eva ia kauanina.

<sup>22</sup> Iesu bai eko'isi 'udai mulinai, ia ibanona kauta ena luva eluvaia luvana delaloia une. Inoku

Puka kabukabuna mai Iesu eluva luvata devamomo'aita.

*Iesu Kau Eta Lalovai Eikabasita.*

<sup>23</sup> Iesu La'au keini nadunai Ielusalemai emia laloanai, kau doutamo ia deikaia vatabulovo koata evavai inoku ia devamomo'aita.

<sup>24</sup> Beia Iesu sibona 'eva kau sia devamomo'aita 'olana ia kau boutai eikabasita.

<sup>25</sup> Ia sibona 'eva kau nuatai demimia davata 'ani eikabasita dainai, sia kau ka betata'u ia kevanai kau valita bekakava.

### 3

*Iesu Nikodemo Ita Deluvaluva.*

<sup>1</sup> Palisea kauna ka vana Nikodemo, ia 'eva Iuda kauta eta kau namana ka.

<sup>2</sup> Boni ka ia eda'a Iesu kevana inoku e'ouia ediaka, “Vaikabasi kaumu e, lai aikabasi oni 'eva Dilava kevanai oasi. Olana sia kau ka 'eva vatabulovo koata oni ovavai katana bemavavaita diba bema Dilava eva sia ia ita.”

<sup>3</sup> Iesu ia ena luva evamuea ediaka, “Lau oni luva umauna a'oumu, kau ka sia bepulu 'udai koanai ia 'eva Dilava ena lovia vanuana sia beikala kovo.”

<sup>4</sup> Nikodemo elavuai ediaka, “Kau 'ani namana koanai ia aboina bepulu 'udai koma? Momo'ai dokadoka melala ivaluana ia sinana bo'anai sia bedodo 'udai mune'e sia bepupulu.”

<sup>5</sup> Iesu ia ena luva evamuea ediaka, “Lau oni luva umauna a'oumu, kau 'eva veiai mai Idume Kabukabunai sia bepulu 'udai koanai ia 'eva Dilava ena lovia vanuanai sia bedodo kovo.

<sup>6</sup> Kauani etata'u kauani evapulua, beia Idume Kabukabuna etata'u idume evapulua.

<sup>7</sup> Bopulu 'udai luvana aluvala 'eva sia botabulovo vaia.

<sup>8</sup> Lani e'unu 'eva eula venia 'abuna eda'ala, ia oni 'eva 'uluna mo o'ika, beia a'i e'asi 'o a eda'ala 'eva sia oikabasi. Idume Kabukabunai depulu kauta boutai vaka kataua boita.”

<sup>9</sup> Nikodemo ia elavuaia 'udai ediaka, “Dava katania aboina bepupulu?”

<sup>10</sup> Iesu ia e'ouia ediaka, “Oni 'eva Isalaela ena vaikabasi kauna namana ka, ia dava 'ounai dava katania sia oikabasita?

<sup>11</sup> Lau oni luva umauna a'oumu, lai aikabasi davatai lai aluva vaita, inoku lai aika davatai lai a'oulai, beia emai luva lai aluva vaita davata oi sia ka oi oabita dae.

<sup>12</sup> Lau atata'u kanobata davatai aluva venimui ia sia oi ovamomo'aita, bema vutuvutu davatai ba'oumui 'eva aboina oi bovamomo'aita?

<sup>13</sup> Lau Kau Nakuna sibo'u mo vutuvutuai a'ovu asi beia sia kau ka vutuvutuai ele'au kovo.

<sup>14</sup> Kano'akunai Mose kau'asi va'ava'ana eisia 'au vitaitanai lau Kau Nakuna vaka beisi'u 'au.

<sup>15</sup> Inoku deabiveni'u kauta boutai 'eva maui keinikeini beabia.

<sup>16</sup> “Olana Dilava kanobata elalo'au venia vaika 'ounai Nakuna ka'onamo mo eveni, beabivenia kauta boutai 'eva sia bebaba, beia maui keinikeini beabia.

<sup>17</sup> Dilava nakuna esinia kanobatai 'eva sia kanobata mekau bevenia, beia ia enai kanobata bevamaulia.

<sup>18</sup> Ia deabivenia kauta boutai 'eva mekau sia bevuala, beia sia deabivenia kauta boutai 'eva 'ani mekau devuaia, 'olana Dilava Nakuna ka'onamo mo vanai sia deabivenia 'ounai.

<sup>19</sup> Valua 'eva kanania boina. 'Ailala 'ani easi kanobata laloanai, inoku kau vabuto'o ulana de'ula beia 'ailala sia deula venia, 'olana eta koakoa 'eva desi'avana.

20 Si'avana devavai kauta boutai 'ailala devaivi-ivia inoku sia de'asi 'ailala laloanai 'olana ia eta koakoa si'avata vaika asi'i demavala'asita une makauna.

21 Beia momo'ai vinalatai demauli kauta 'eva de'asi 'ailala laloanai, 'olana Dilava lelana daitai dedadai 'eva eta koakoai bevala'asi kau be'ika.”

### *Ioane Iesu Valina Ekava.*

22 Kanania mulinai, Iesu ibanona kauta ita dela'asi deda'a Iudea kanona, ua'i ia ita kena demia inoku kau evaidi'uta kabukabu.

23 Vaidi'u kabukabu kauna Ioane vaka Salima avekenai Aenonai evaidi'u kabukabu, 'olana ua'i 'eva vei namana inoku kau dedada'a 'eva evaidi'uta kabukabu.

24 Kanaua 'eva Ioane vabuto'o lumanai asido'o de'alavua koanai.

25 Inoku Ioane ibanona kauta vaidi 'eva Iuda kauna ka ita eta koakoa Dilava vilanai beva-makamakata 'udai idi'una deviala vaia.

26 Kanaua 'ounai ia deasi Ioane kevanai inoku de'ouia dediaka, “Vaikabasi kaumu e, Iolidana nutuna avekenai kau kanaua ita oi omia, valina okava kauna 'eva vali'u ia kau evaidi'uta kabukabu, inoku kau boutai 'eva ia kevana deda'ala.”

27 Ioane eta luva evamuea ediaka, “Kau 'eva Dilava beveveni davana mo bedavalia.

28 Oi sibomui vaka 'ani oi ovamomo'ai'u 'eva lau adiaka, 'lau 'eva sia Keliso, beia lau 'eva esini'u 'ana'i vakaia ia.’

29 Kamoane makamaka ateatena kanaua 'eva ia eadavala kauna ena, inoku kamoane makamaka kauna ena kau ia kevanai elalava 'eva lelana e'ika koanai elalonama si'asi'a. Lalonamana kanania 'eva lau e'u, inoku vali'u nua'u lalonama 'ani evonu.

<sup>30</sup> Ia 'eva namana be'ao, beia lau 'eva kiki'u ba'ao.”

<sup>31</sup> “Akai easi kauna 'eva kau boutai akatai, kanobatai epulu kauna 'eva kanobata ena, inoku kanobata davata mo eluva vaita. Vutuvutuai easi kauna 'eva kau boutai akatai.

<sup>32</sup> Ia eika mai e'ika davata valita ekakava, beia sia kau ka ia ena luva eabita dae.

<sup>33</sup> Beia ena luva eabi dae kauna 'eva eva-momo'aia Dilava 'eva momo'ai Dilavana.

<sup>34</sup> Dilava esinia kauna 'eva Dilava ena luva eluvavai, 'olana Dilava etata'u Idume Kabukabuna ia nuanai evavonua.

<sup>35</sup> Kamana eta'u nakuna elalo'au venia inoku dava boutai ia imanai 'ani eudata.

<sup>36</sup> Nakuna evamomo'aia kauna 'eva mauli keinikeini 'ani eabia, beia nakuna lelana daitai sia edadai kauna 'eva mauli sia beikala kovo, inoku Dilava ena badu ia akanai bemimia.”

## 4

### *Iesu Samalia Ateatena Ita Deluvaluva.*

<sup>1</sup> Palisea kauta vali deika 'eva Iesu kau doutamo eabita debanoia mai evaidi'uta kabukabu beia vaidi'u kabukabu kauna Ioane 'eva sia dounamo eabita.

<sup>2</sup> Beia umauna 'eva Iesu sibona sia evaidi'u kabukabu, ia ibanona kauta mo devaidi'u kabukabu.

<sup>3</sup> Iesu eikabasi Palisea kauta 'eva vali kanania 'ani deika koanai ia Iudea evikania, emue mune'e beda'a Kalilea.

<sup>4</sup> Vali'u ia 'eva Samalia kanonai 'ani beda'a keini bedada'a.

<sup>5</sup> Ia easi Samalia vanuana ka vana Sukala ai ela'asi, vanua kanaua 'eva Iakobo eta'u nakuna Iosepa eva'oula venia kanona kevanai.

<sup>6</sup> Iakobo ena vei 'ulina 'eva ua'i, inoku Iesu vei 'ulina 'aba'abanai emia divo 'olana 'ani ebavunu vaika dala laka'ina ida'anai. Melala 'eva 'ani eado'alavuni.

<sup>7</sup> Samalia ateatena ka vei 'ado easi inoku Iesu ia enoia ediaka, “Vei vitalua veni'u bainu.”

<sup>8</sup> Ia ibanona kauta 'eva deda'a vanuai iani be-tatava.

<sup>9</sup> Samalia ateatena ia ena luva evamuea edi-aka, “Oni 'eva Iuda kaumu ia lau 'eva Samalia ateate'u, inoku dava 'ounai keva'uai vei onoinoi?” ('Olana Iuda kauta 'eva Samalia kauta ita sia de-vaka'onamo.)

<sup>10</sup> Iesu enu'ovi ia e'ouia ediaka, “Bema Dilava ena ainama bomaikabasia mai dai kevamuai vei enoinoi kauna bomaikabasia koanai, ia bomanoia inoku ia mauli veina bemavenimu.”

<sup>11</sup> Ateate ediaka, “Kau namamu e, sia mai emu vei 'ado davana ka maivaka vei 'ulina kanania 'eva e'ovu vaika. Mauli veina kanaua 'eva a'i boabia?”

<sup>12</sup> Lai 'ava'avamai Iakobo 'eva vei 'ulina kanania evenimai, ia sibona einuia, nakuna deiniuia, ena mamoe mai bolomakau vaka deiniuia, inoku oni Iakobo okeinua, una?”

<sup>13</sup> Iesu ena luva evamuea ediaka, “Vei kanania deiniuia kauta boutai 'eva vei bata beba 'udai.

<sup>14</sup> Beia lau haveveni veina beinua kauna 'eva vei bana sia beba kovo. Momo'ai dokadoka, lau haveveni veina 'eva ia nuanai mauli veinai be'ao bebubudi be'itabu'itabu mauli keinikeini beve-nia.”

<sup>15</sup> Ateate Iesu e'ouia ediaka, “Kau namamu e, vei kanaua veni'u, inoku vei ba'u sia baba 'udai

maivaka sia ba'asi nia'i vei ba'ado 'udai.”

<sup>16</sup> Iesu ia e'ouia ediaka, “Da'a adamu 'aea inoku lalua oi bo'asi.”

<sup>17</sup> Ateate ediaka, “Lau sia mai ada'u.” Iesu ia e'ouia ediaka, “Oni sia mai adamu okoma 'eva okomolo.

<sup>18</sup> 'Olana oni adamu boutai ima, inoku vali'u kevamuai emimia kauna 'eva sia oni adamu umauna. Vali'unai oluvala luvana 'eva luva umauna.”

<sup>19</sup> Ateate ediaka, “Kau namamu e, vali'u nua'u 'ani e'ailala, oni 'eva enolea kaumu.

<sup>20</sup> Lai 'ava'avamai 'eva lolo kanania akanai Dilava dekukudivo venia, beia oi Iuda kaumui oi odiaka kukudivo 'abuna 'eva ka'onamo Ielusalemai mo.”

<sup>21</sup> Iesu ediaka, “Ateate e, e'u luva abia dae, bonina e'asi koanai sia lolo kanania akanai 'o sia Ielusalemai Kamata oi bokukudivo venia.

<sup>22</sup> Oi Samalia kaumui sia oi oikabasia kauna oi okukudivo venia, lai Iuda kaumai lai aikabasia kauna lai akukudivo venia, 'olana Dilava ena vamauli dalana 'eva Iuda kauta kevatai e'asi.

<sup>23</sup> Beia melalana e'asi inoku vali'u 'ani ela'asi, bekukudivo venia dokadoka kauta 'eva idumeai mai luva umaunai Kamata bekukudivo venia. 'Olana Kamata 'eva kanaua boina deku-kudivo venia kauta ekavuta.

<sup>24</sup> Dilava 'eva Idume, kanaua 'ounai deku-kudivo venia kauta 'eva idumeai mai luva umaunai bekukudivo venia.”

<sup>25</sup> Ateate ediaka, “Lau aikabasi Mesia, vamauli kauna vana Keliso be'asi, ia be'asi koanai dava boutai be'oulai kave'i kevamaiai.”

<sup>26</sup> Inoku Iesu ia e'ouia ediaka, “Kauna 'eva lau kau'u kanania vali'u aluva venimu.”

<sup>27</sup> Melala kanaua'i ia ibanona kauta demue deasi 'eva detabulovo si'asi'a, 'olana Iesu ateate ka

ita deluvaluva deikaia. Beia sia kau ka elavuaia, “O'ula dava?” 'o “Ia ita dava 'ounai oi oluvaluva?”

<sup>28</sup> Inoku ateate ena vodu evikania, emue eda'a vanuai kau e'outa ediaka,

<sup>29</sup> “Omai kada'a kau ka oikaia, 'ana'inai avavai koakoata kataua boutai eluva vaita, ama'i Keliso kanaua?”

<sup>30</sup> Inoku kau vanuai dela'asi Iesu kokona deda'a.

<sup>31</sup> Kanaua laloanai ibanona kauta Iesu denoia dediaka, “Vaikabasi kaumu e, iani kena ania.”

<sup>32</sup> Beia ia e'outa ediaka, “Lau mai e'u iani bania davana 'eva sia oi oikabasia.”

<sup>33</sup> Inoku ibanona kauta sibota viloatai dev-ilavuai vai'ade dediaka, “Ama'i kau ka 'ani iani kena eabi easi evenia.”

<sup>34</sup> Iesu e'outa ediaka, “E'u iani 'eva esini'u kauna ena ula bavavaia maivaka ia eveni'u vinalana bavaolea.

<sup>35</sup> Oi odiaka, ‘Vuaia vani mo demimia inoku iukuta bonina bedaia.’ Beia lau a'oumui, Makamui ovaaku isi loba oikata kave'i, iani 'ani demaku'a beukuta.

<sup>36</sup> Ukuuku kauna tavana eabia inoku loba ianina edouabou mauili keinikeini 'abunai, kanaua 'ounai ivadona kauna mai iukuna kauna 'eva belalonama ka'ona.

<sup>37</sup> Deluvaia luvana 'eva luva umauna, ‘Vadovado kauna edeana ia eukuku kauna 'eva edeana.’

<sup>38</sup> Lau asinimui sia oi obavunu vaia lobanai iani oi bo'uku. Vaida loba kanaua bavununa 'ani deyavaia inoku oi otata'u eta bavunu ianina oi oabia.”

<sup>39</sup> Vanua kanaua laloanai Samalia kauta doutamo Iesu deabivenia 'olana ateate ena vali kava luvana 'ounai, ateate ediaka, “Ia eta'u avavai koakoata boutai eluva vaita.”

<sup>40</sup> Kanaua 'ounai Samalia kauta deasi kevana koanai, ia denoia ia ita bemimia, inoku Iesu boni lua ua'i emia.

<sup>41</sup> Iesu ena luva 'uluta deika laloanai kau doutamo vaka deabivenia.

<sup>42</sup> Kau kataua ateate de'ouia dediaka, “Vali'u ia lai abivenia 'eva sia oni oluva luvana 'ounai, beia vali'u lai sibomai kaiamai ai lai a'ika, maivaka lai aikabasi kau kanania 'eva momo'ai dokadoka kanobata ivamaulina kauna.”

*Iesu Lovia Kauna Ka  
Nakuna Evanama'inala.*

<sup>43</sup> Boni ivaluana eole mulinai Iesu eko'isi eda'a Kalilea.

<sup>44</sup> Iesu sibona eluva ediaka, “Enolea kauna ena vanua umauna kauta 'eva 'olana sia be'aku.”

<sup>45</sup> Iesu Kalileai ela'asi koanai, Kalilea kauta ia deabia dae, 'olana Ielusalemai La'au keini naduna laloanai ia vaka deda'a ua'i inoku ia evavai davata boutai 'eva makatai deika 'ounai.

<sup>46</sup> Iesu mune'e emue eda'a Kalileai Kana vanuanai, ua'i vei evakeinia vine veinai eao. Ua'i Kapelanauma laloanai lovia 'olana kauna ka nakuna moluanena e'olele.

<sup>47</sup> Kau kanaua Iesu ludeai easi Kalileai luvana eika koanai, ia eda'a Iesu kevana enoia beda'a nakuna bevanama'inala 'olana ia 'ani bebaba.

<sup>48</sup> Iesu ia e'ouia ediaka, “Oi koa mai vatabulovo koata sia oi bo'ika koanai sia oi boabiveni kovo.”

<sup>49</sup> Lovia kauna ediaka, “Kau namana e, mai kada'a ke naku'u 'eva 'ani bebaba.”

<sup>50</sup> Iesu ia e'ouia ediaka, “Da'a, nakumu 'eva 'ani bemaui.” Lovia kauna Iesu ena luva eva-momo'aia inoku eda'a.

<sup>51</sup> Ia dala kanaua eda'aia laloanai ena da'alaabi kauta deasi dalai deividavali, nakuna emauli luvana de'ouia.

<sup>52</sup> Ia elavuaita melala koana vida nakuna enama'ina, inoku ia dediaka, “Lavi ado'alavuni melala koana ka'onamo 'eva kauna 'oleleta deole.”

<sup>53</sup> Kamana elaloune melala koana kanaua'i 'eva Iesu ia e'ouia ediaka, “Nakumu 'eva 'ani bemaui.” Kanaua 'ounai ia mai ena luma kauta boutai Iesu deabivenia.

<sup>54</sup> Iesu Iuda evikania mulinai easi Kalileia laloanai 'eva vatabulovo koana ivaluana kanania evavaia.

## 5

### *Betesaida 'Ovuna 'Aba'abanai Iesu Kau Ka Evanama'inala.*

<sup>1</sup> Boni vaida deole mulinai, Iuda kauta eta nadu dainai Iesu ele'au eda'a Ielusalema.

<sup>2</sup> Ua'i Ielusalemai nutuala ka vana 'Mamoe nutualana' kevanai 'ovu kikina ka 'Ebelu leletai vana de'aeia 'Betesaida', inoku kevanai 'eva laani aioleta ima delavaia kaiukaiu.

<sup>3</sup> 'Abu kataua'i 'olele kauta doutamo deno, maka 'ede kauta, 'ome kauta, bade kauta, (devi'ima vei be'ilo'iloa.

<sup>4</sup> 'Olana melala ka ka anelu e'ovu 'ovu veina e'ilo'iloa, mulinai 'olele kauna ka 'ovuai be'ovu makava kauna 'eva ena 'olele dava beia benama'ina.)

<sup>5</sup> 'Abu kanaua'i kau ka vikauna boutai koi navui kalavani (38) e'olele eno.

<sup>6</sup> Iesu 'olele kauna kanaua'i eno eikaia koanai eikabasi ia 'eva siako mo kanaua boina eno, inoku Iesu ia elavuaia ediaka, “Oni o'ula bonama'ina, una?”

<sup>7</sup> 'Olele kauna Iesu ena luva evamuea ediaka, “Kau namana e, vei e'ilo'iloa koanai lau sia mai idulu'u kauna ka 'ounai lau akovokovo ba'ovu laloanai kau ka 'ani e'ana'ia vaila'uai.”

<sup>8</sup> Inoku Iesu ia e'ouia ediaka, “Ko'isi, emu 'eta lo'ua abia da'a.”

<sup>9</sup> Komolonai kau kanaua enama'ina, inoku eko'isi ena 'eta elo'uia eabia eda'a.

Ua 'eva melala kabukabunai koa kanania epulu.

<sup>10</sup> Kanaua 'ounai Iuda kauta namata kau kanaua 'oleleai enama'ina kauna de'ouia dediaka, “Vali'u 'eva melala kabukabuna, ia oni emu 'eta ovuala 'eva eta talavatu oukua.”

<sup>11</sup> Beia ia eta luva evamuea ediaka, “Evanama'ina'u kauna e'ou'u ediaka, ‘Emu 'eta abiaisi da'a.’ ”

<sup>12</sup> Inoku ia delavuaia dediaka, “Kau davana oni e'oumu, ‘Emu 'eta abiaisi da'a.’? ”

<sup>13</sup> Enama'ina kauna sia eikabasi ia dai evanama'inala 'olana Iesu ua'i do'u laloanai eneke dodo eda'a ovo.

<sup>14</sup> Muliai Iesu kau kanaua lo'e kabukabuna laloanai edavalia inoku e'ouia ediaka, “Lele'u ika, oni 'eva 'ani onama'ina, si'avana sia bovavai 'udai, dava si'avana vaika ka kevamuai asi'i emapulu 'udai makauna.”

<sup>15</sup> Inoku kau kanaua eda'a Iuda kauta namata kevatai e'outa ia evanama'inala kauna 'eva Iesu.

### *Dilava Nakuna Ena Siavu.*

<sup>16</sup> Kanaua 'ounai Iuda kauta namata 'eva Iesu devaiviivia 'olana ia melala kabukabunai dava katania evavai 'ounai.

<sup>17</sup> Iesu e'outa ediaka, “Lau Kama'u 'eva melala bounai evinaula easimo vali'u melala kanania. Lau vaka avinaula.”

<sup>18</sup> Luva kanania 'ounai Iuda kauta namata 'eva deula Iesu beaku bala. Sia melala kabukabuna mo talavatuna eukuia 'ounai, beia ia Dilava e'aeia ia kamauna umauna maivaka ia sibona Dilava ita evavitaitata.

<sup>19</sup> Kanaua 'ounai Iesu eta luva kanania evamuea koma, “Lau oi luva umauna a'oumui. Nakuna 'eva sia dava ka sibona bevavaia bedaia. Ia 'eva Kamana evavai vinalata kataua mo e'ika evavaita. Kamana dava evavai 'eva Nakuna vaka evavai.

<sup>20</sup> 'Olana Kamana 'eva Nakuna elalo'au venia 'ounai evavai davata boutai evaikala. 'O, sia katania mo, dava namata vaidava vaka bevaikala, inoku oi bo'ika 'eva oi botabulovo si'asi'a.

<sup>21</sup> Kamana etata'u ba kauta evako'isita 'udai inoku mauli evenita vitaitanai mo Nakuna etata'u eula venita kauta mauli evenita.

<sup>22</sup> Mune'e Kamana sibona sia kau ka evaluvala, beia valuva siavuna itoinai 'ani Nakuna evenia,

<sup>23</sup> kanaua'i Kamana 'olana de'aku vitaitanai kau boutai Nakuna 'olana be'aku, Nakuna 'olana sia e'aku kauna 'eva Kamana kanaua Nakuna esinia kauna vaka 'olana sia e'aku.

<sup>24</sup> “Lau oi luva umauna a'oumui, e'u luva e'ika mai esini'u Dilavana eabivenia kauna 'eva mauli keinikeini 'ani eabia inoku mekau sia bevuala. Ia 'eva ba ai 'ani ekeini inoku 'ani mauli laloanai edodo.

<sup>25</sup> “Lau oi luva umauna a'oumui, bonina 'eva 'ani e'asi, inoku vali'u bonina 'ani ele'au, ba kauta 'eva Dilava Nakuna lelana be'ika, inoku lele ika kauta kataua 'eva bemaui.

<sup>26</sup> Kamana sibona 'eva mauli 'olana, vitaitanai ia eta'u Nakuna mauli 'olanai evaaoa.

<sup>27</sup> Maivaka Dilava eta'u Nakuna valuva siavuna 'ani evenia 'olana ia 'eva Kau Nakuna 'ounai.

<sup>28</sup> E'u luva kanania 'ounai sia oi botabulovo. Melalana 'ani e'asi, mitavai ba kauta kataua boutai Nakuna lelana be'ika,

<sup>29</sup> inoku mitavatai bela'asi. Nama'ina devavai kauta kataua 'eva beko'isi mauli keinikeini beabia, inoku si'avana devavai kauta kataua 'eva beko'isi mekau bevuala.

30 “Lau sibo'u e'uai sia dava ka bavavaia. Lau a'ika luvana vitaitanai mo valuva vinalata avavai, kanaua 'ounai e'u valuva 'eva ekomolo, 'olana lau sibo'u e'u nama'ina sia akavua, beia esini'u kauna ena ula akavua.

*Iesu Valina Dekava Kauta Vaida.*

31 “Lau sibo'u vali'u bakakava koanai, e'u vali kava 'eva sia bevamomo'aia.

32 Lau 'ou'uai vali'u ekakava kauna 'eva edeana, inoku lau aikabasia ia eluvala luvana 'eva momo'ai.

33 “Oi 'ani ovisini Ioane kevana inoku ia eta'u luvavaia.

34 Lau vali'u ikavana 'eva sia kau kevatai e'asi, beia lau Ioane ena vali kava luvana aluvala kanaua'i oi vamauli oi bodavalia.

35 Ioane 'eva lamepa boina e'ani 'ailala eveni, ia oi 'eva melala kava'ina mo ena 'ailala oi olalonama vaia.

36 “Lau dai'uai vali'u ikavana kanaua 'eva Ioane ekeinia. Kama'u vinala eveni'u bavaleta vinalata avavaita katania detata'u Kama'u esini'u valina dekakava.

37 Inoku Kama'u esini'u kauna ia sibona eta'u lau vali'u ekava. Asido'o melala kai ia lelana oi oika kovo maivaka asido'o ia vailana oi oikaia,

38 'o ena luvava vaka nuamuiai sia emia, 'olana ia esinia kauna sia oi oabivenia 'ounai.

39 “Puka kabukabunai oi okavua kave'i 'olana oi olalovaia luvava kataua laloatai mauuli keinikeini oi bodavalia. Puka kabukabuna kanania 'eva lau mo vali'u ekakava,

40 beia sia oi o'ula oibo'asi keva'uai mauuli oi-boabia.

41 “Lau 'eva kau etai vanama'ina luvava sia abitadae,

<sup>42</sup> beia lau 'eva oi aikabasimui kave'i, oi nuamuiiai Dilava ilalo'au venina sia emimia.

<sup>43</sup> Lau 'ani Kama'u vanai asi, beia lau sia oi oabi'udae. Beia bema kau ka sibona vanai be'asi koanai 'ani oi boabiadae.

<sup>44</sup> Oi ka ka sibomui viloamuiiai ivanama'inamui luvata oi okakavu, beia Dilava mo sibona kevanai vanama'ina e'asi kanaua 'eva sia oi okavua, kanaua boina koanai a oi boabiveni'u koma?

<sup>45</sup> “Beia nuamuiiai sia oi bolalovaia lau Kama'u vailanai va'evai bane'emui divo. Asi'i, oi va'evai bene'emui divo kauna 'eva Mose, ia enai emui nuabata oi o'uleta.

<sup>46</sup> Bema oi Mose oabivenia dokadoka koanai lau vaka oi boabiveni'u, 'olana ia 'eva lau vali'u eleleia.

<sup>47</sup> Beia ia eleleia davana bema sia oi boabivenia koanai lau e'u luva aboina oi boabivenia?”

## 6

*Iesu Kau Sinavu Boutai Imanavui*  
(5,000) *Evananita.*

(Mt 14.13-21; Mk 6.30-44; Lk 9.10-17)

<sup>1</sup> Boni vaida deole mulinai Iesu ekeini eda'a Kalilea 'ovu avekenai. ('Ovu kanaua vana ka 'eva Tibelia 'ovuna),

<sup>2</sup> inoku kau mato namavaikana Iesu mulinai develi deda'a 'olana ia 'olele kauta evanama'inata vatabulovota koata kataua deika 'ounai.

<sup>3</sup> Inoku Iesu loloai ele'au eda'a inoku ibanona kauta ita demiadivo.

<sup>4</sup> Iuda kauta eta La'au keini naduna 'eva 'ani ekevai.

<sup>5</sup> Iesu ekailao kau mato namavaikana deasi venia eikata koanai, Ia Pilipo elavuaia ediaka, “Iani a'i eka tava kau katania ekavananita?”

<sup>6</sup> Ia siako eikabasi dava bevavaia, beia Pilipo bevakovoa 'ounai kanaua elavuaia koma.

<sup>7</sup> Pilipo ia ena luva evamuea ediaka, “Moni doutamo vaika iani kamatava beia sia bedaia, iani kava'ita mo 'ani beani.”

<sup>8</sup> Ibanona kauta ka vana Andelea, Simona Petelo kadina eko'isi ediaka,

<sup>9</sup> “Melo kikina ka nia'i 'eva mai ena palaoa kikita ima mai sisi kikita lua. Beia kataua 'eva a eka komata 'olana kau 'eva doutamo vaika?”

<sup>10</sup> Iesu ibanona kauta e'outa ediaka, “Kau ovamiata divo.” Ua 'eva teleai, inoku kau boutai demiadivo, momoluane 'avaeana boutai 'eva sinavu boutai imanavui (5,000).

<sup>11</sup> Iesu palaoa eabita, Dilava evanama'inala, inoku demiadivo kauta kataua eta ula vitaitanai evenita, inoku sisi vaka kanaua boina evavaia.

<sup>12</sup> Boutai deani vunu koanai Iesu ibanona kauta e'outa ediaka, “Iani kalita boutai oi bodoubou, sia kikina ka oi bovikania.”

<sup>13</sup> Kanaua 'ounai palaoa imai deani vunu kalita kataua dedoubouta aleka 'ouka lua devavonuta.

<sup>14</sup> Iesu vatabulovo koana kanaua evavaia kau deikaia mulinai deluva dediaka, “Momo'ai dokadoka, enolea kauna be'asi kanobatai kauna 'eva kanania.”

<sup>15</sup> Iesu eikabasi ia eta ulai be'asi beabia kao eta lovia 'olana kaunai bevaaoo, kanaua 'ounai ia sibona mune'e eda'a ovo eda'a loloi ele'au.

*Iesu Vei Akanai Eda'a.*  
(Mt 14.22-33; Mk 6.45-52)

<sup>16</sup> Elavilavi koanai ibanona kauta de'ovu deda'a 'ovuai,

<sup>17</sup> asiai dele'au deveau keini Kapelanauma deda'aia 'eva 'ani evabulala divo, Iesu 'eva sia ia vilootai.

18 Lani namavaikana eunu 'eva 'ovu evaka'udaia.

19 Ia maela koi 'o vani boita debala ilulao koanai Iesu vei akanai eda'a, asi kokona easia, deikaia 'eva demakau si'asi'a.

20 Beia Iesu e'outa ediaka, “Nia 'eva lau. Sia oi bomakau.”

21 Inoku ia mailalonamata ita asiai devaelea'au, komolonaimo deula venia 'abuna nabuanai devadai'au.

### *Kau Iesu Dekavuia.*

22 Elani kau mato ua'i 'ovu avekenai demia kauta deikabasi asi ka'onamo mo ua'i, inoku Iesu 'eva ibanona kauta ita sia ele'au, ibanona kauta sibota mo deveauasi deda'a.

23 Inoku asi vaidia Tibeliai deasi deda'a Lovia namana palaoa evanama'inala kau evenita deani 'abuna kevanai dela'asi.

24 Kau mato deikabasi Iesu mai ibanona kauta ita ua'i vailata asi'i, inoku asi kataua'i dele'au deda'a Kapelanauma Iesu deka'vuia.

### *Iesu 'Eva Mauli Bokamana.*

25 Ia 'ovu avekenai ua'i Iesu dedavalia koanai delavuaia dediaka, “Vaikabasi kaumu e, oni aida mo okeini oasi nia'i?”

26 Iesu eta luva evamuea ediaka, “Lau oi luva umauna a'oumui, oi lau okavu'u 'olana 'eva sia vatabulovo koata oi oikata 'ounai beia palaoa oi oani bo'amui dekubu 'ounai.

27 Iani besi'avana davana kanaua dainai sia oi bovinaula beia iani bemimia beda'a mauili keinikeini dainai oi bovinaula, Lau Kau Nakuna 'eva iani kanania bavenimui. Kama'u Dilava ena siavu koana aka'uai 'ani e'uileia.”

28 Inoku ia delavuaia dediaka, “Lai dava bavavaia 'eva Dilava eulavai vinaulata lai bavavaita?”

29 Iesu eta luva evamuea ediaka, “Dilava ena vinaula 'eva kanania. Esinia kauna mo oi boabivenia.”

30 Kanaua 'ounai ia delavuaia dediaka, “Vatabulovo koana davana bovavaia lai baikala inoku lai babivenimu? Davana bovavaia?”

31 Ita 'ava'avata kano'akunai mana deania, Puka kabukabunai ilelena vitaitana, ‘Vutuvutuai easi manana Mose evenita deania.’ ”

32 Iesu e'outa ediaka, “Lau oi luva umauna a'oumui, sia Mose vutuvutu bokamana oi evenimui, beia lau Kama'u eta'u vutuvutu bokamana umauna oi evenimui.

33 'Olana Dilava ena bokama 'eva vutuvutuai e'ovu easi kauna inoku kanobatai mauli eveveni.”

34 Ia de'ouia dediaka, “Lovia namana e, bokama kanania 'eva melala boutai bovenimai.”

35 Inoku Iesu ia e'outa ediaka, “Lau 'eva mauli bokamana, beasi veni'u kauna 'eva sia bevikolo kovo, maivaka beabiveni'u kauna 'eva sia beveiba kovo.

36 Beia lau 'ani oi a'oumui, 'ani oi oika'u inoku sia oi oabiveni'u.

37 Kama'u eveni'u kauta boutai 'eva be'asi keva'u, inoku easi veni'u kauna 'eva lau sia 'ani balo'oa kovo.

38 'Olana lau vutuvutuai a'ovu asi 'eva sia sibo'u e'u ula bavavaia, beia esini'u kauna ena ula vinaulana bavavaia.

39 Inoku esini'u Dilavana ena ula 'eva kanania, eveni'u kauta kataua boutai 'eva sia ka bavataulea, beia melala to'onai bavako'isita 'udai.

40 'Olana lau Kama'u ena ula 'eva kanania, Nakuna beikala mai beabivenia kauta boutai 'eva

mauli keinikeini beabia, inoku melala to'onai 'eva bavako'isita 'udai.”

<sup>41</sup> Luva kanania 'ounai Iuda kauta Iesu denunu vaia, 'olana ia ediaka, “Lau 'eva vutuvutuai e'ovu easi bokamana.”

<sup>42</sup> Inoku ia dediaka, “Nia 'eva Iesu, Iosepa nakuna, ia kamana mai sinana kaikabasita. Vali'u ia aboina ediaka, ‘Lau vutuvutuai a'ovu asi.’?”

<sup>43</sup> Iesu eta luva evamuea ediaka, “Sibomui viloa-muai nunuvai nunuvai kanana ovapuala.

<sup>44</sup> Sia kau ka 'ani beasi keva'u beia Kama'u esini'u kauna betata'u bevuala be'asi keva'u, inoku melala to'onai bavako'isia 'udai.

<sup>45</sup> Enolea kauta Puka kabukabunai 'ani deleleia, ‘Dilava ia boutai 'ani bevaikabasita.’ Kama'u le-lena de'ika maivaka kevanai ikabasi deabia kauta boutai 'eva be'asi keva'u.

<sup>46</sup> Sia kau ka Kamata eikaia kovo, beia Dilava kevanai easi kauna mo sibona Kamata eikaia.

<sup>47</sup> Lau oi luva umauna a'oumui. Deabiveni'u kauta 'eva 'ani mauli keinikeini deabia.

<sup>48</sup> Lau 'eva mauli bokamana.

<sup>49</sup> Oi 'ava'avamui kano'akunai mana deania, beia deba.

<sup>50</sup> Beia vutuvutuai e'ovu easi bokamana kana-nia, beania kauna 'eva sia bebaba.

<sup>51</sup> Lau 'eva mauli bokamana, vutuvutuai a'ovu asi. Bema kau ka bokama kanania beania 'eva bemauli keinikeini. Bokama kanania 'eva lau vidio'u, kanobata kauta mauli beabia dainai baveveni.”

<sup>52</sup> Inoku Iuda kauta sibota viloatai deadedua dediaka, “Kau kanania aboina vidiona bevenita eka ania?”

<sup>53</sup> Iesu e'outa ediaka, “Lau oi luva umauna a'oumui. Lau Kau Nakuna vidio'u sia oi boania

mai lala'u sia oi boinua koanai oi nuamuiai mauli sia bemimia.

<sup>54</sup> Lau vidio'u eania mai lala'u einua kauna 'eva mauli keinikeini 'ani eabia inoku melala to'onai 'eva bavako'isia 'udai.

<sup>55</sup> 'Olana lau vidio'u 'eva iani umauna maivaka lala'u 'eva inuinu veina umauna.

<sup>56</sup> Lau vidio'u eania mai lala'u einua kauna 'eva lau nua'uai emimia maivaka lau ia nuanai amimia.

<sup>57</sup> Kama'u emauli kauna eta'u esini'u, lau 'eva Kama'u 'ounai amauli vitaitanai lau kauani'u beania kauna 'eva lau 'ou'uai bemaui.

<sup>58</sup> Vutuvutuai e'ovu easi bokamana 'eva kanania. Oi 'ava'avamui mana deania inoku deba, beia bokama kanania beania kauna 'eva bemaui keinikeini."

<sup>59</sup> Iesu Kapelanaumai evaikabasi laloanai Iuda kauta eta lo'e ai luva katania eluvavaita.

### *Mauli Keinikeini Luvata.*

<sup>60</sup> Debanokia kauta doutamo lelana deika inoku dediaka, "Luva kanania 'eva epasisi, luva kanania dai betata'u beabiadae?"

<sup>61</sup> Iesu 'ani eikabasi debanokia kauta luva kanaua denunuvai nunuvaia 'ounai e'outa ediaka, "Luva kanania nuamui evabavunua, una?"

<sup>62</sup> Lau Kau Nakuna bamaele'au amia makava 'abuna bamada'ala oi bomaika'u koanai a oi bomakoma?

<sup>63</sup> Idume Kabukabuna 'eva mauli eveveni, kauani 'eva sia dava ka evapulua. Luva katania a'oumui 'eva idume luvata mai mauli luvata.

<sup>64</sup> Beia oi vaidia 'eva sia oi oabiveni'u." 'Olana siako Iesu 'ani eikabasi kau davata sia deabivenia mai dai ia venina beveveni mai kouna bekokou.

<sup>65</sup> Maivaka ia eluva ediaka, “Kanaua 'ounai 'ani a'oumui adiaka, 'Kama'u sia kau ka bevuala be'asi koanai sia kau ka 'ani beasi keva'u.’ ”

<sup>66</sup> Melala kanaua'i Iesu debanoia kauta doutamo ia devikania maivaka mulinai sia deda'a 'udai.

<sup>67</sup> Inoku Iesu ibanona kauta 'ouka lua elavuaita ediaka, “Oi vaka oi o'ula oi bovikani'u, una?”

<sup>68</sup> Simona Petelo enu'ovi ediaka, “Lovia namana e, lai dai kevana lai bada'ala? Mauli keinikeini luvata 'eva oni kevamuai demimia.

<sup>69</sup> Lai 'ani abivenimu mai lai aikabasi oni 'eva Dilava ena Kabukabu Kaumu.”

<sup>70</sup> Inoku Iesu e'outa ediaka, “Lau oi kaumui 'ouka lua adilamu. Beia oi ka 'eva diabololo.”

<sup>71</sup> Ia eluvavaia kauna 'eva Iuda Isakaliote kauna, Simona nakuna, ia ibanona 'ouka lua kauta ka, muliai Iesu venina beveveni mai kouna bekokou kauna.

## 7

### *Iesu Bo'akalana Ia Sia Deabivenia.*

<sup>1</sup> Kanaua mulinai Iesu Kalileia laloanai eda'a to'ato'a, ia sia eula beda'a Iudea 'olana Iuda kauta namata 'eva de'imaia beaku bala.

<sup>2</sup> Iuda kauta eta Aiole naduna 'ani ekevai koanai,

<sup>3</sup> Iesu kadina deta'u de'ouia dediaka, “'Abu kanania bovikania boda'a Iudea inoku debanomu kauta ua'i vatabulovo koata bovavai be'ika.

<sup>4</sup> 'Olana kau ka sibona e'ula bevala'asia koanai ia sia dava ka vunivuniai evavaia, dava katania 'ani ovavaita 'ounai sibomu vala'asimu kanobata itoinai deikabasimu.”

<sup>5</sup> Kanaua deluva koma 'olana ia kadina umauta vaka ia sia deabivenia.

<sup>6</sup> Inoku Iesu e'outa ediaka, “Asido'o e'u melala umauna easi. Beia melala boutai oi kevamui'ai 'eva dedaia.

<sup>7</sup> Kanobata 'eva sia oi evaiviivimui beia lau evaiviivi'u, 'olana ia evavaia davana kanaua lau aluva vaia 'eva si'avana.

<sup>8</sup> Oi oda'a nadu 'abuna, lau 'eva sia 'ani bavasi nadu 'abuna kanana 'olana e'u melala umauna 'eva asido'o edaia.”

<sup>9</sup> Ia luva kanania eluvaia inoku Kalileiai emia.

*Iesu Eda'a Ielusalema  
Aiole Naduna Laloanai.*

<sup>10</sup> Iesu kadina deda'a nadu 'abuna mulinai ia vaka eda'a nadu 'abuna beia vunivuniai eda'a, sia ela'asi do'u vailatai.

<sup>11</sup> Inoku nadu kanaua laloanai Iuda kauta namata 'eva Iesu dekavuia delavu'ai lavuai vaia, “Kau kanaua 'eva a'i?”

<sup>12</sup> Ua'i do'u laloanai 'eva deteoteo vaia, vaidia dediaka, “Ia 'eva kau nama'ina.” Vaidia mune'e dediaka, “Asi'i, ia 'eva kau e'ana'ia vaita va'eva.”

<sup>13</sup> Beia Iuda kauta namata makauta demakau dainai, sia kau ka do'u vailatai ia luvana eluva kovo.

<sup>14</sup> Nadu kukuanai Iesu ele'au eda'a lo'e kabuk-abunai ena vaikabasi emakavala.

<sup>15</sup> Inoku Iuda kauta namata 'eva detabulovo si'asi'a dediaka, “Kau kanania sia eda'a malele 'abuna ka, beia aboina ia eikabasi vaika?”

<sup>16</sup> Iesu eta luva evamuea ediaka, “E'u vaikabasi luvata 'eva sia lau sibo'u e'u, beia esini'u Dilavana enai de'asi.

<sup>17</sup> Kau ka Dilava ena ula vinalana bevavaia koanai ia 'ani beikabasi, lau e'u vaikabasi 'eva Dilava kevanai easi 'o lau sibo'u e'u luva.

<sup>18</sup> Kau ka sibona ena ula luvana eluvala kauna 'eva sibona ena nama'ina ekavua beia esinia

kauna ena nama'ina ekavua kauna 'eva momo'ai kauna, ia nuanai 'eva va'eva asi'i.

<sup>19</sup> Mose talavatu 'ani evenimui, una? Beia sia kau ka talavatu kanania oabi'inia. Dava 'ounai oi o'ula boaku ba'u?"

<sup>20</sup> Do'u kauta ena luva devamuea dediaka, "Oni 'eva 'olamu esi'avana, dai e'ula beaku bamu?"

<sup>21</sup> Iesu e'outa ediaka, "Lau melala kabukabunai vatabulovo koana ka'onamo avavaia, inoku oi boumuiai otapulovo si'asi'a.

<sup>22</sup> Mose ivaiva vinalana evenimui 'ounai melala kabukabunai melo kikita oi oivata. (Ivaiva vinalana 'eva sia Mose kevanai easi, beia oi kubumui 'ava'avamui kevatai easi.)

<sup>23</sup> Vali'u melala kabukabuna laloanai melo oi oivata 'eva Mose ena talavatu asi'i oi omaukua makauna. Dava 'ounai melala kabukabuna laloanai kau ka kauanina itoinai avanama'inala dainai oi obadaveni'u?

<sup>24</sup> Sia Dava ikata koatai oi bovaluvata, beia dava eta komolo umautai oi bovaluvata."

### *Ia 'Eva Keliso, Una?*

<sup>25</sup> Boni kanaua'i Ielusalema kauta vaida delavuai lavuai dediaka, "De'ula beaku bala kauna 'eva kanania, una?

<sup>26</sup> Kauna 'eva kanana do'u vailatai eilolo, inoku sia luva ka ia kevanai deluvala kovo, ama'i kau namata 'ani delalovaia dokadoka ia 'eva Keliso 'o?

<sup>27</sup> Keliso be'asi koanai ena asi 'abuna 'eva sia kau ka beikabasia, beia kau kanania ena asi 'abuna 'eva ita kaikabasia."

<sup>28</sup> Inoku Iesu lo'e kabukabunai evaikabasi laloanai evaoi ediaka, "O, oi lau oikabasi'u, a'i asi vaka oi oikabasia. Lau sia sibo'u e'u ulai asi, beia esini'u Dilavana 'eva momo'ai. Ia sia oi oikabasia,

<sup>29</sup> beia lau 'eva ia aikabasia 'olana lau ia kevanai asi maivaka ia lau esini'u."

<sup>30</sup> Luva kanania 'ounai ia deula belioa beia sia kau ka ia kaunai ekao'au 'olana ena melala 'eva asido'o edaia.

<sup>31</sup> Do'u laloanai kau doutamo ia deabivenia inoku dediaka, “Keliso be'asi koanai, ia vatabulovo koata doutamo bevavai kau kanania bekeinia, una?”

### *Vaida Deula Iesu Belioa.*

<sup>32</sup> Palisea kauta 'eva mato Iesu deteoteo vaia leleta deika inoku kabukabu kauta namata mai Palisea kauta deta'u lo'e kabukabuna de'imala kauta desinita Iesu belioa.

<sup>33</sup> Inoku Iesu ediaka, “Lau 'eva melala kava'ina mo oi ita ekamia vakaia bamumue bada'a esini'u kauna kevana.

<sup>34</sup> Oi bokavu'u beia sia 'ani oi bodavali'u. Sia 'ani oi boasi lau bamimia 'abuna.”

<sup>35</sup> Inoku Iuda kauta namata sibota devilavuui viveni dediaka, “Kau kanania 'eva a beda'ala kanaua'i ita ia sia ekadavaliala? Beda'a ua'i Iuda kauta deda'aia odaoda 'Elene kauta viloatai demimia kauta kevatai inoku 'Elene kauta bevaik-abasita, 'o?”

<sup>36</sup> Luva kanania anina 'eva dava, ia ediaka, ‘Oi bokavu'u beia sia oi bodavali'u,’ maivaka ‘Sia 'ani oi boasi lau bamimia 'abuna.’ ”

### *Mauli Beveveni Veina.*

<sup>37</sup> Nadu melalana to'onai 'eva melala namana, Iesu elavadivo inoku eluva 'unu'unu ediaka, “Bema kau ka vei bana ebaba 'eva be'asi lau keva'u inoku vei be'inu.

<sup>38</sup> Puka kabukabunai deleleia boina, ‘Lau eabiveni'u kauna 'eva ia nuanai maui veina be'alu itani nutu boina.’ ”

<sup>39</sup> Luva kanania 'eva Idume Kabukabuna eluvavaia ia deabivenia kauta kataua 'eva muliai

bevenita, 'olana Iesu ena nuavi asido'o eabia 'ounai Idume Kabukabuna 'eva asido'o eveni.

*Kau Viloata E'alama.*

<sup>40</sup> Kau vaida Iesu ena luva katania 'uluta deika koanai dediaka, “Momo'ai dokadoka kau kanania 'eva Enolea kauna.”

<sup>41</sup> Vaida dediaka, “Ia 'eva Keliso.” Beia vaida delavuai dediaka, “Keliso 'eva aboina Kalileiai be'asi?”

<sup>42</sup> Puka kabukabunai kanania eluva koma. Keliso 'eva Davida kekenai bepupulu Davida emia vanuana Betele'ema laloanai.”

<sup>43</sup> Kanaua 'ounai Iesu dainai kau viloata e'alama.

<sup>44</sup> Ia vaida deula belioa, beia sia kau ka ia kaunai ekao'au.

*Iuda Kauta Namata  
Iesu Sia Deabivenia.*

<sup>45</sup> Mulinai lo'e kabukabuna de'imala kauta kataua demue deda'a kabukabu kauta namata mai Palisea kauta kevata, inoku ia deta'u delavuaita dediaka, “Dava 'ounai ia sia oi ovuala o'asi?”

<sup>46</sup> 'Ima'ima kauta eta luva devamuea dediaka, “Kanaua koanai easimo vali'u sia kau ka kanaua boina eluva kovo kau kanania eluluva boinai.”

<sup>47</sup> Inoku Palisea kauta denu'ovi dediaka, “Oi vaka 'ani evada'amui va'eva, una?”

<sup>48</sup> Oi olalovaia kau namata 'o Palisea kauta ka ia eabivenia? Asi'i.

<sup>49</sup> Beia do'u kauta kataua Mose ena talavatu sia deikabasia kauta 'eva Dilava ena sivada ia akatai bemimia.”

<sup>50</sup> Ia banota ka Nikodemo, melala ka eda'a Iesu kevana kauna, eta'u e'outa ediaka,

<sup>51</sup> “Ita eta talavatu avekenai sia kau ka mekau ekavenia 'avaea, ia lenea ekaika makava, ia dava evavaia davana ekaikabasia makava.”

<sup>52</sup> Ia de'ouia dediaka, “Oni vaka Kalileia kaumu, una? Puka kabukabuna boikala inoku bodavalia sia enolea kauna ka 'eva Kalileiai be'asi.”

<sup>53</sup> Inoku kau boutai demue itaumo ena luma deda'aia.

## 8

### *Mo'a Ateatena Dedavalia.*

<sup>1</sup> Beia Iesu 'eva eda'a Olive lolona.

<sup>2</sup> Elani 'avu'ani vabulanai Iesu mune'e eda'a lo'e kabukabuna laloanai kau boutai deda'a ia ded-abubua, inoku ia emiadivo evaikabasita.

<sup>3</sup> Talavatu 'ola kauta mai Palisea kauta ateate ka ekulakulai dedavalia devuaia deasi. Do'u vailatai devalavala,

<sup>4</sup> inoku Iesu de'ouia dediaka, “Vaikabasi kaumu e, ateate kanania 'eva ekulakulai lai adavalia.

<sup>5</sup> Inoku Mose ena talavatu laloanai 'eva kanania eluva koma, katania boita 'a'atete 'eva bika'ai eka aku bata. Vali'u oni 'eva dava okoma?”

<sup>6</sup> Lavuai kanania deabia deda'a Iesu kevanai 'eva bevaviua, kanaua'i va'evai bene'eadivo. Beia Iesu 'eva esilidivo imana li'uli'unai kanoai elelelele.

<sup>7</sup> Ia delavuaia basibasi koanai, ia elavadivo inoku e'outa ediaka, “Viloamui'ai kau ka sia mai emu si'avana kaumu, bika'a itoa makava ateate kanania akua.”

<sup>8</sup> Mune'e esilidivo kanoai elelelele 'udai.

<sup>9</sup> Luva kanania deika kauta 'eva ka'oka'o deda'a ovo motunai emakavala eda'amo 'alu'alunai epua, Iesu mo sibona devikania ateate ia kevanai elava.

<sup>10</sup> Iesu elavadiivo inoku ateate elavuaia ediaka, “Ateate e, kau katania a'i? Sia kau ka mekau evenimu?”

<sup>11</sup> Ateate ediaka, “Lovia namana e, sia kau ka.” Iesu ia e'ouia ediaka, “Lau vaka oni sia mekau ka bavenimu, da'a sia si'avana ka bovavaia 'udai.”

*Iesu 'Eva Kanobata 'Ailalana.*

<sup>12</sup> Iesu kau eluva venita 'udai koanai ediaka, “Lau 'eva kanobata 'ailalana. Kau ka lau muli'uai bedada'a kauna 'eva vabuto'o laloanai sia bedada'a, beia maui 'ailalana beabia.”

<sup>13</sup> Palisea kauta ia de'ovenia dediaka, “Oni sibomu valimu okakava, emu vali kava 'eva sia momo'aina.”

<sup>14</sup> Iesu enu'ovi ediaka, “Lau sibo'u vali'u akakava 'eva momo'aina 'olana lau a'i asi mai a bada'ala 'abuna 'eva aikabasia beia oi 'eva lau a'i asi 'o a bada'ala 'abuna sia oi oikabasia.”

<sup>15</sup> Oi kau eta koakoa vitaitanai oi ovaluvata. Lau 'eva sia kau ka avaluvala.

<sup>16</sup> Beia lau valuva bavavaia koanai, e'u valuva 'eva bekomolo, 'olana lau 'eva sia sibo'u, Kama'u esini'u kauna vaka keva'uai.

<sup>17</sup> Emui talavatu laloanai kanania eleleia koma, kau lua eta luva beka'onamo 'eva momo'ai luvana.

<sup>18</sup> Lau sibo'u vali'u akakava mai Kama'u esini'u kauna vaka vali'u ekakava.”

<sup>19</sup> Inoku ia delavuaia dediaka, “Kamamu 'eva a'i?”

Iesu enu'ovi ediaka, “Oi sia oikabasi'u 'ounai Kama'u sia oikabasia. Bema oi lau bomaikabasi'u koanai Kama'u vaka oi bomaikabasia.”

<sup>20</sup> Iesu lo'e kabukabuna laloanai veniveni monina ine'edivona 'abuna kevanai evaikabasi laloanai luva katania eluvavai. Beia sia kau ka ia elioia 'olana ia ena melala asido'o edaia.

*Lau Adada'a 'Abuna  
Sia 'Ani Oi Boda'a.*

<sup>21</sup> Iesu ia e'outa 'udai ediaka, “Lau 'ani bada'a tau, inoku oi lau bokavu'u beia emui si'avanai oi bobaba. Sia 'ani oi boda'a lau badada'a 'abuna.”

<sup>22</sup> Luva kanania 'ounai Iuda kauta namata sibota devilavuai viveni dediaka, “Ia kanania eluva koma, ‘Lau badada'a 'abuna sia 'ani oi boasi,’ Kanaua anina 'eva ia sibona beaku bala, 'o?”

<sup>23</sup> Iesu ediaka, “Oi 'eva venuai oasi lau 'eva akai asi, oi 'eva kanobata kanania kaumui, lau 'eva sia kanobata kanania kau'u.

<sup>24</sup> Lau 'ani a'oumui, ‘Emui si'avanai oi bobaba,’ Kauna 'eva Lau kau'u sia oi boabiveni'u koanai emui si'avanai oi bobaba.”

<sup>25</sup> Ia delavuaia dediaka, “Inoku oni 'eva dai?” Iesu eta luva evamuea ediaka, “Lau siako a'oumui lau 'eva dai.

<sup>26</sup> Oi daimuiai lau luva doutamo bamaluva maivaka mekau namana bamavenimui, beia esini'u kauna 'eva momo'ai umauna, lau ia kevanai aika luvana mo kanobata kauta a'outa.”

<sup>27</sup> Iesu Kamana lovana eakuia 'eva ia nuata sia de'eko'ovi.

<sup>28</sup> Kanaua 'ounai Iesu ediaka, “Lau Kau Nakuna oi boisi'u 'au koanai 'ani oi boikabasi kauna 'eva lau kau'u, maivaka lau sibo'u sia dava ka avavaia beia Kama'u dava evaikabasi'u vitaitatai aluvavaita.

<sup>29</sup> Maivaka esini'u kauna 'eva ebano'u, ia lau sia evikani'u 'avaea, 'olana melala boutai ia ivalalonamana vinalata avavai.”

<sup>30</sup> Luva kania e'outa 'eva kau doutamo ia de-abivenia.

*Abela'amo Kekena.*

31 Inoku Iesu Iuda kauta ia deabivenia kauta e'outa ediaka, "E'u vaikabasi luvata daitai oi bodadai koanai oi 'eva lau ibano'u kaumui umau-mui.

32 Inoku luva umauna oi boikabasia, maivaka luva umauna betata'u beluvune'emui."

33 Ia denu'ovi dediaka, "Lai Abela'amo kekena kaumai maivaka sia kau ka da'alana lai ba'abi. Lai aboina beluvune'emai okoma?"

34 Iesu e'outa ediaka, "Lau oi luva umauna a'oumui, si'avana evavaia kauna 'eva si'avana da'alana e'abi.

35 Da'alaabi kauna 'eva 'ola kauna ena lumai sia bemia keinikeini, 'ola kauna nakuna 'eva luma kanau'i bemia keinikeini.

36 Kanaua 'ounai Nakuna betata'u beluvune'emui koanai oi 'ani eluvune'emui vaika.

37 Lau aikabasimui oi Abela'amo kekena kaumui, beia e'u luva nuamui'ai sia emimia 'ounai oi o'ula boaku ba'u.

38 Lau Kama'u vailanai aikata davata a'oumui, inoku oi kamamui enai oi oika davata oi ovavaita."

39 Ia Iesu ena luva devamuea dediaka, "Lai kamamai 'eva Abela'amo." Inoku ia e'outa ediaka, "Oi Abela'amo nakuna koanai Abela'amo evavai vinaulata oi bomavavai.

40 Dilava enai luva momo'aina aika davana a'oumui, beia oi dala okakavu oi boaku ba'u. Abela'amo sia kanaua boina evavaia.

41 Oi kamamui evavai davata 'eva oi ovavaita." Ia Iesu de'ouia dediaka, "Lai sia apulu tauasi, lai kamamai 'eva ka'onamo Dilava mo sibona."

42 Iesu mune'e ediaka, "Oi kamamui Dilava koanai oi bomalalo'au veni'u. 'Olana lau Dilava enai asi nia'i. Lau 'eva sia sibo'u e'u ulai asi beia Kama'u esini'u.

<sup>43</sup> Dava 'ounai aluvavai luvata 'eva nuamui sia de'eko'ovi? 'Olana e'u luva iabidaena sia oi oula venia.

<sup>44</sup> Oi kamamui 'eva diabolo, oi o'ula kamamui ena ula vinaulana oi bovavaia. Ia 'eva akuaku kauna makavanai easimo vali'u, ia sia luva umautai eluluva, 'olana ia nuanai sia luva umauna ka emimia. Ia dede luvana eluvala 'eva ia ena koakoa umauna, 'olana ia 'eva dede kauna maivaka dede boutai kamata.

<sup>45</sup> Lau luva umauna aluvala 'ounai lau e'u luva sia oi ovamomo'aia.

<sup>46</sup> Inoku kau ka lau e'u si'avana 'ani odavalia 'eva bovala'asia. Lau luva umauna aluvala koanai dava 'ounai e'u luva sia oi ovamomoaia?

<sup>47</sup> Dilava nakuna kauna 'eva Dilava ena luva leleta be'ika, beia oi lele sia o'ika 'olana oi sia Dilava nakuna.”

### *Iesu Mai Abela'amo.*

<sup>48</sup> Iuda kauta namata Iesu ena luva devamuea dediaka, “Oni 'eva Samalia kaumu inoku ka'uba si'avana vaika nuamui emimia, 'ani lai aluva komolo, una?”

<sup>49</sup> Inoku Iesu ediaka, “Sia ka'uba si'avana vaika ka lau nua'uai emimia. Lau Kama'u 'olana a'aku beia oi lau 'ola'u sia oi o'aku.

<sup>50</sup> Lau sia sibo'u e'u nuavi akavua, beia Dilava betata'u e'u nuavi bekavua maivaka ia 'eva lau 'ou'uai valuva bevavaia kauna.

<sup>51</sup> Lau oi luva umauna a'oumui, e'u luva eabi'inia kauna 'eva sia beba kovo.”

<sup>52</sup> Kanaua'i Iuda kauta namata dediaka, “Vali'u lai aikabasimu kave'i ka'uba si'avana vaika oni nuamui emimia. Abela'amo eba mai enolea kauta vaka deba beia oni odiaka emu luva beabi'inia kauna 'eva ba aviavina sia beonovaia.

<sup>53</sup> Oni lai kamamai Abela'amo okeinua, una? Ia eba mai enolea kauta vaka deba, inoku olalovaia oni 'eva dai?"

<sup>54</sup> Iesu enu'ovi ediaka, "Bema lau sibo'u baku'uabalai, e'u akuabalai anina asi'i. Lau Kama'u, ia kauna eta'u lau eaku'uabalai. Inoku oi odiaka, ia 'eva 'Emui Dilava'.

<sup>55</sup> Oi ia sia oi oikabasia, lau 'eva ia aikabasia. Inoku lau bamadiaka lau ia sia aikabasia koanai lau dede kau'u itani oi boimui. Beia lau ia aikabasia maivaka ena luva abi'inita.

<sup>56</sup> Oi kamamui Abela'amo e'u boni beikala 'ounai elalonama, inoku eikaia 'eva elalonama si'asi'a."

<sup>57</sup> Iuda kauta namata dediaka, "Oni vikaumu asido'o imanavui (50) eabia, ia Abela'amo aboina 'eva oikaia?"

<sup>58</sup> Iesu e'outa ediaka, "Lau oi luva umauna a'oumui. Abela'amo asido'o epulu lau 'eva 'ani amia."

<sup>59</sup> Luva kanaua deika koanai ia bika'a deabisi Iesu beakua, beia ia sibona do'u viloatai epode eda'a ovo lo'e kabukabuna evikania eda'a.

## 9

### *Iesu Maka 'Ede Kauna Makana Evanama'inata.*

<sup>1</sup> Iesu dala eda'aia eda'a laloanai maka 'ede kauna ka eikaia, ia 'eva makana 'edetai epulu.

<sup>2</sup> Ibanona kauta Iesu delavuaia dediaka, "Vaikabasi kaumu e, dai ena si'avana 'ounai kau kania makana 'edenai epulu? Kau kanania ena si'avanai 'o sinana kamana eta si'avanai?"

<sup>3</sup> Iesu eta luva evamuea ediaka, "Sia kau kania ena si'avanai maivaka sia sinana kamana eta

si'avanai, beia Dilava ena siavu vinaulata ia kauanai bevala'asi beikala 'ounai.

<sup>4</sup> Lau esini'u Dilavana ena vinaula laniai ekavavaia. Boni be'asi koanai sia kau ka bevinaula.

<sup>5</sup> Lau kanobatai amimia laloanai lau 'eva kanobata ena 'ailala.”

<sup>6</sup> Iesu luva kanania eluvavaia mulinai kanoai e'anodi inoku 'anodinai 'ika'ika emataia, 'ede kauna makana luana eukuta.

<sup>7</sup> Inoku e'ouia ediaka, “Da'a, Siloama 'ovunai vailamu bokaovai.” (Siloama anina 'eva sinia.) Kau kanaua eda'a vailana ekaovai, emue easi makana 'ani denama'ina.

<sup>8</sup> Kevanai kauta mai 'ana'inai ia enoi va'ame deikaia kauta delavuai lavuai dediaka, “'Ana'inai ua'i emia enoi va'ame kauna ka'onamo kanania, una?”

<sup>9</sup> Vaida dediaka, “Kauna ka'onamo kanana.” Vaida dediaka, “Asi'i, ikana ia mo delaovenia.” Beia ia sibona e'outa ediaka, “Kauna 'eva lau kau'u kanania.”

<sup>10</sup> Ia deta'u delavuaia dediaka, “Vali'u makamu a deko oikaika?”

<sup>11</sup> Ia eta luva evamuea ediaka, “Kau vana de'aea Iesu kauna eta'u 'ika'ika emataia maka'u eukuta, inoku e'ou'u bada'a Siloama 'ovunai vaila'u bakaovai. Kanaua 'ounai ada'a vaila'u akaovai inoku aikaika.”

<sup>12</sup> Ia delavuaia dediaka, “Kau kanaua 'eva a'i?” Ia ediaka, “Lau sia aikabasi.”

*Palisea Kauta Makana Denama'ina Kauna Delavuaia.*

<sup>13</sup> Ia deta'u kau kanaua 'ana'inai makana de'ede kauna devuaia deasi Palisea kauta kevata.

<sup>14</sup> Boni kanaua'i Iesu 'ika'ikai 'ede kauna makana eukuta deata 'eva melala kabukabuna.

15 Kanaua 'ounai Palisea kauta vaka ia delavuaia aboina makana denama'ina. Maka 'ede kauna ediaka, "Ia 'ika'ikai maka'u eukuta, akaovai inoku vali'u 'ani aikaika."

16 Palisea kauta vaida dediaka, "Kau kanania 'eva sia Dilava kevanai easi 'olana ia melala kabukabuna sia eabi'inia." Beia vaida dediaka, "Si'avana kauna ka aboina vatabulovo koata katania boita bevavai?" Kanaua 'ounai ia viloata e'alama.

17 Mune'e Palisea kauta maka 'ede kauna delavuaia 'udai dediaka, "Ia eta'u makamu eva ata, inoku oni olalovaia ia 'eva dai?" Kau kanaua ediaka, "Ia 'eva enolea kauna."

18 Iuda kauta namata sia devamomo'ai ia 'eva maka 'ede kauna inoku 'ani makana denama'ina eda'amo kau kanaua sinana kamana de'aeta deasi.

19 Inoku ia delavuaia dediaka, "Nia oi nakumui, una? Makana 'edetai epulu kauna kanania, a? Vali'u ia makana 'eva aboina denama'ina inoku eikaika?"

20 Ia sinana kamana ia eta luva devamuea dediaka, "Lai aikabasi ia 'eva lai nakumai maivaka ia makana 'edetai epulu.

21 Beia vali'u aboina eikaika maivaka dai eta'u ia makana evanama'inata 'eva lai sia aikabasi. Olavuaia, ia 'ani e'aida'aida sibona lovana eakuia."

22 Ia sinana mai kamana 'eva Iuda kauta namata makauta demakau 'ounai kanaua deluva koma. 'Olana Iuda kauta 'ani devamomo'aia kau ka be'oudae Iesu 'eva Keliso koanai Iuda kauta eta lo'eai bevala'asia.

23 Kanaua 'ounai sinana kamana dediaka, "Ia 'ani e'aida'aida olavuaia."

24 Maka 'ede kauna melala ivaluana de'aeia inoku de'ouia dediaka, "Dilava boakuabalai. Lai

aikabasi evanama'inamu kauna kanania 'eva si'avana kauna.”

<sup>25</sup> Kau kanaua eta luva evamuea ediaka, “Lau sia aikabasi, ia si'avana kauna 'o asi'i. Dava ka'onamo lau aikabasia 'eva maka'u de'ede beia vali'u 'ani aikaika.”

<sup>26</sup> Inoku ia delavuaia dediaka, “Oni kevamuai dava evavaia? Makamu aboina eva ata?”

<sup>27</sup> Ia eta luva evamuea ediaka, “Lau siako 'ani a'oumui, beia lele'u sia oi oika. Vali'u dava 'ounai oi o'ula boika 'udai? Oi vaka o'ula ia ibanona kaumui ai oi bo'ao, una?”

<sup>28</sup> Ia deta'u depilaia si'ala dediaka, “Oni 'eva kau kanaua ibanona kaumu, lai 'eva Mose ibanona kaumai.

<sup>29</sup> Lai aikabasi Dilava eta'u Mose eluvavenia, beia lai sia aikabasi kau kanana a'i easi.”

<sup>30</sup> Kau kanaua eta luva evamuea ediaka, “Vali'u dava edeana umauna epupulu 'olana ia maka'u evanama'inata beia oi sia oikabasia ia a'i easi.

<sup>31</sup> Ita kaikabasi Dilava si'avana kauta leleta sia e'ika. Ia dekukudiyo venia kauta maivaka ena ula vinaulana devavaia kauta mo kataua leleta e'ika.

<sup>32</sup> 'Ana'inai kanobata emakavala koanai easimo vali'u sia kau ka eta'u makana 'edetai epulu kauna ka makana evanama'inata valina ka kaika kovo.

<sup>33</sup> Kau kanania 'eva sia Dilava kevanai easi koanai ia vinaula kanania boina sia bemavavaia.”

<sup>34</sup> Ia deta'u kau kanaua ena luva devamuea dediaka, “Oni 'eva si'avana laloanai opulu inoku oni otata'u lai bovamalelemai, una?” Ia deta'u Iuda kauta eta lo'eai dedolia asi.

*Sia Deabiveni Kauta 'Eva  
Maka 'Ede Kauna Boina.*

<sup>35</sup> Iesu kau kanaua dedolia asi valina eika inoku edavalia koanai ia elavuaia ediaka, “Oni Lau Kau Nakuna oabiveni'u, una?”

<sup>36</sup> Kau kanaua Iesu ena luva evamuea ediaka, “Loviamu e, ia 'eva dai? 'Ou'u lau batata'u ia babivenia.”

<sup>37</sup> Iesu ediaka, “Oni vali'u ia 'ani oikala kauna kanania oni eluva venimu.”

<sup>38</sup> Inoku kau kanaua ediaka, “Lovia namana e, lau abiveni.” Inoku ia Iesu ekukudivo venia.

<sup>39</sup> Iesu mune'e ediaka, “Valuva dainai lau asi kanobata kanania'i, kanaua'i maka 'ede kauta beikaika inoku deikaika kauta kataua makata be'ede.”

<sup>40</sup> Palisea kauta vaida ia kevanai kauta kataua 'eva luva kanaua deika inoku delavuaia, “Lai vaka makamai de'ede, una?”

<sup>41</sup> Iesu e'outa ediaka, “Oi Makamui dema'ede koanai kevamui'ai si'avana bemaasi'i. Beia vali'u oi odiaka oi oikaika 'ounai emui si'avana 'eva demimia do'o.”

## 10

### *Luva Ivavitaitana Mamoe I'imana kauna.*

<sup>1</sup> Iesu ediaka, “Lau oi luva umauna a'oumui. Kau ka mamoe alana nutualanai sia eda'adodo beia ala kukuanai etakeini kauna 'eva vinoa mai abi'avaea kauna.

<sup>2</sup> Ia nutulai eda'adodo kauna 'eva mamoe i'imana kauna.

<sup>3</sup> Nutuala eikalakao kauna 'eva kau kanaua nutualana eluvua inoku mamoe ia lлена de'ika. Ia ena mamoe vata umautai e'aeta inoku e'ana'iavaita dela'asi.

<sup>4</sup> Ia ena mamoe boutai evala'asi paluta koanai, ia vilatai edada'a inoku ena mamoe ia mulinai dedada'a 'olana ia lлена deikabasia.

<sup>5</sup> Ia sia kau edeana ka mulinai bedada'a, kau kanaua kevanai beveau akauma 'olana kau edeana kauna lelana sia deikabasia.”

<sup>6</sup> Iesu luva ivavitaitana kanania'i e'outa, beia ia eluvavaia luvana ovonai sia deovo.

*Iesu 'Eva Mamoe I'imana  
Kauna Mediana.*

<sup>7</sup> Kanaua 'ounai Iesu eluva 'udai ediaka, “Lau oi luva umauna a'oumui. Lau 'eva mamoe eta nutuala.

<sup>8</sup> Deasi 'ana'i kauta boutai kataua 'eva vinoa kauta mai abi'avaea kauta, kanaua 'ounai mamoe ia leleta sia deika.

<sup>9</sup> Lau 'eva nutuala, lau e'uai dedododo de'asi kauta boutai 'eva bemaui. Ia 'eva beda'adodo mai bela'asi iani bedavali.

<sup>10</sup> “Vinoa kauna 'eva bevinaomo, beakuakumo mai bevasi'avanalamo 'ounai easi. Lau asi 'eva mamoe maui beabia mai maui nama'ina itoina beabia.

<sup>11</sup> Lau 'eva mamoe i'imata kauna mediana, mamoe i'imata kauna mediana 'eva ena maui ene'ea divo ena mamoe daitai.

<sup>12</sup> Tava ekakavu kauna 'eva sia mamoe i'imata kauna umauna, sia mai ena mamoe, kanaua 'ounai 'oveka 'asina e'asi eikala koanai ia mamoe evikanita inoku eveau 'akauma, inoku 'oveka 'asina mamoe ealata 'eva deveau siusiu.

<sup>13</sup> Kau kanaua eveau 'akauma 'olana ia 'eva tava ekakavu kauna maivaka mamoe naota sia e'aku.

<sup>14</sup> “Lau 'eva mamoe i'imata kauna mediana, lau e'u mamoe aikabasita maivaka e'u mamoe vaka lau deikabasi'u.

<sup>15</sup> Vitaitanai Kama'u lau eikabasi'u maivaka lau Kama'u aikabasia, inoku e'u maui ane'ea divo e'u mamoe daitai.

<sup>16</sup> Lau maie'u mamoe edeata vaidā 'eva sia ala kanania laloanai demimia, kataua vaka bavuata ba'asi inoku ia vaka lele'u be'ika, ua'i mamoe 'itona beka'onamo mai mamoe i'imata kauna beka'onamo.

<sup>17</sup> Kama'u elalo'au veni'u 'olana lau e'u mauli ane'eia divo, kanaua'i lau batata'u babia 'udai.

<sup>18</sup> Sia kau ka e'u mauli bebuku vai'u, beia lau sibou e'u ulai e'u mauli ane'eia divo. Lau mai e'u siavu e'u mauli bane'ea divo maivaka mai e'u siavu e'u mauli babia 'udai. Kama'u enai abia luvana 'eva kanaua."

<sup>19</sup> Luva katania'i Iuda kauta viloata 'ani e'alama 'udai.

<sup>20</sup> Kau doutamo dediaka, "Ka'uba si'avana vaika ia nuanai emimia kanaua'i ia 'olana esi'avana. Dava 'ounai ia lelana oi o'ika?"

<sup>21</sup> Beia vaidā dediaka, "Luva katania 'eva sia kau nuanai ka'uba si'avana vaika emimia kauna belu-luva luvata. Inoku ka'uba si'avana vaika maka 'ede kauna makana 'ani beva ata?"

### *Iuda Kauta Iesu Devasi'avanala.*

<sup>22</sup> Inoku Ielusalemai Lo'e Ivakabukabuna Naduna bonina eabia, ua 'eva 'elu bonina,

<sup>23</sup> inoku Iesu 'eva Lo'e kabukabuna laloanai vaka ka akanai eda'a, vaka kanaua 'eva Solomona ena vaka.

<sup>24</sup> Iuda kauta namata deasi Iesu delavaia kaiukaiu inoku delavuaia dediaka, "Ovalalo to'ato'amai, aida melalanai bo'oumai kave'i? Bema oni Keliso 'eva 'oumai kave'i."

<sup>25</sup> Inoku Iesu eta luva evamuea ediaka, "Lau oi 'ani a'oumui, beia oi 'eva sia oabiveni'u. Lau Kama'u vanai vatabulovo vinalata avavaita davata 'eva lau vali'u dekakava.

<sup>26</sup> Beia oi sia oabiveni'u 'olana oi 'eva sia lau e'u mamoe.

27 E'u mamoe 'eva lele'u de'ika. Lau aikabasita, maivaka ia lau muli'uai dedada'a.

28 Lau mauli keinikeini avenita, ia 'eva sia bebaba maivaka sia kau ka ima'uai bebukuvai'u.

29 Kama'u mamoe kataua eveni'u kauna 'eva dava boutai ekeinita, sia kau ka Kama'u imanai bebukuvaita.

30 Lau mai Kama'u lai laluanā 'eva ka'onamo.”

31 Iuda kauta luva kanania deika melalanai bika'a deabisi ia beaku bala.

32 Beia Iesu e'outa ediaka, “Kama'u kevanai vatabulovo vinalata namata doutamo avaikamui, vinala katania davana dainai bika'ai oi boaku'u?”

33 Ia ena luva devamuea dediaka, “Sia vinala nama'ita ovavai dainai bika'ai lai bakumu, beia Dilava ovasi'avanala dainai, 'olana oni 'eva kau mo beia oni sibomu Dilavai ovaomou.”

34 Iesu eta luva evamuea ediaka, “Emui Talavatu laloanai 'ani deleleia, Dilava ediaka, 'Oi 'eva dilava.’

35 Dilava ena luva easi kevatai kauta e'aeta dilava, inoku Puka kabukabuna luvana kanaua 'eva sia ekauka.

36 Dilava evasiavu'u mai esini'u asi kanobatai inoku adiaka, 'Lau 'eva Dilava Nakuna,' koanai, dava 'ounai oi odiaka lau Dilava avasi'avanala?

37 Bema Kama'u ena vinala sia bavavaia koanai sia oiboabiveni'u.

38 Beia Kama'u ena vinala avavai koanai, bema sia oi oabiveni'u beia vinala avavai kataua oi boobivenita. Kanaua'i oi boikabasi maivaka ovota oi bo'ovo Kama'u 'eva lau nua'uai maivaka lau 'eva Kama'u nuanai.”

39 Iuda kauta namata dala dekavu 'udai Iesu belioa. Beia Ia kevatai eda'a ovo.

40 Iesu Iolidana nutuna ekeinua avekenai emue eda'a makavanai Ioane evaidi'u kabukabu 'abunai ua'i emia,

41 kau doutamo deasi ia kevana inoku dediaka, "Ioane vatabulovo koana sia ka evavaia, ia kau kanania lovana eakuia davata boutai 'eva demomo'ai."

42 Inoku 'abu kanaua'i kau doutamo Iesu de-abivenia.

## 11

### *Lasalo 'Ani Eba.*

1 Kau ka vana Lasalo 'eva e'olele, ia 'eva Betani kauna, Malia 'a'ana Maleta ita eta vanua.

2 Malia kanaua eta'u deolo bonana medianai Lovia namana Iesu aena esisita inoku vuinai eukuta lada ateatena, ia lovuna Lasalo 'eva e'olele kanaua.

3 Kanaua 'ounai lovuna luana luvadesinia eda'a Iesu kevana dediaka, "Lovia namana e, olalo'au venia kauna 'eva e'olele."

4 Iesu vali kanania eika koanai ediaka, "Olele kanania 'eva sia Lasalo bevabala vaika, kanania epulu 'eva Dilava ena nuavi bevala'asia, kanaua'i Dilava Nakuna nuavi beabia."

5 Iesu 'eva Maleta kadina Malia ita maivaka lovuta Lasalo elalo'au venita.

6 Iesu Lasalo ena 'olele valina eika koanai, ia boni lua vaka ua'i emia 'abunai emia.

7 Inoku Iesu ibanona kauta e'outa ediaka, "Ita ekamue ekada'a Iudea."

8 Ibanona kauta dediaka, "Vaikabasi kaumu e, ualavi mo Iuda kauta namata deula bika'ai beaku bamu, beia oni emu lalovai 'eva bomumue boda'a ua'i?"

9 Iesu enu'ovi ediaka, "Melala ka'onamo laloanai melala koana 'eva 'ouka lua (12), kau

ka laniai edada'a kauna 'eva sia betatai, 'olana ia kanobata ena 'ailala eikala.

<sup>10</sup> Beia boniai bedada'a kauna 'eva betatai, 'olana ia nuanai 'eva 'ailala asi'i."

<sup>11</sup> Iesu luva kanaua eluvaia mulinai e'outa ediaka, "Eta kau Lasalo 'eva 'ani emuinai tabu. Beia lau bada'a ua'i bakuia."

<sup>12</sup> Ibanona kauta dediaka, "Lovia namana e, ia e'olele emuinai koanai ia 'ani benama'ina 'udai."

<sup>13</sup> Iesu 'eva Lasalo ena ba lovana eakuia, beia ibanona kauta delalovaia ia 'eva emuinai tabu.

<sup>14</sup> Kanaua 'ounai Iesu e'outa kave'i ediaka, "Lasalo 'ani eba,

<sup>15</sup> oi 'oumuiai lau ua'i asi'i 'eva lalo'u denanama, 'olana oi botata'u lau oi boabiveni'u. Ita kada'a ia kevana."

<sup>16</sup> Inoku Toma (de'aea vi'apala) banona vaidata kataua e'outa ediaka, "Ita vaka kada'a, ia ita ekaba ka'ona."

### *Bai Ko'isi 'Udai Mai Maui 'Olana 'Eva Iesu.*

<sup>17</sup> Iesu ua'i ela'asi koanai de'ouia Lasalo 'ani eba kauanina boni vani mitava laloanai 'ani emia.

<sup>18</sup> Ielusalema mai Betani viloata 'eva sia edau'a itani maela lua boina.

<sup>19</sup> Maleta mai Malia lovuta Lasalo eba 'ounai Iuda kauta doutamo deasi ia kevatai nuata bevakula'ilata.

<sup>20</sup> Maleta Iesu easi valina eika koanai, ia ela'asi eda'a ita bevidavali, beia Malia 'eva lumai emia.

<sup>21</sup> Maleta Iesu e'ouia ediaka, "Lovia namana e, oni nia'i bomamia koanai lovu'u sia bemaba.

<sup>22</sup> Beia lau aikabasi vali'u Dilava kevanai dava bonoinoi vaia davana ia betata'u bevenimu."

<sup>23</sup> Iesu Maleta e'ouia ediaka, "Oni lovumu 'eva beko'isi 'udai."

24 Maleta enu'ovi ediaka, “Lau aikabasi melala to'onai ba kauta boutai beko'isi 'udai koanai ia vaka beko'isi 'udai.”

25 Iesu Maleta e'ouia ediaka, “Lau 'eva ko'isi 'udai maivaka mauli. Lau eabiveni'u kauna 'eva bemaba, beia bemaui.

26 Inoku demaui mai deabiveni'u kauta boutai 'eva sia beba kovo beia bemaui keinikeini. Oni luva kanania oabivenia, una?”

27 Maleta enu'ovi ediaka, “O, Lovia namana, lau abivenimu, oni 'eva Keliso, Dilava Nakuna be'asi kanobatai kauna.”

### *Iesu Ekani.*

28 Luva kanania eluvaia mulinai emue eda'a kadina Malia e'aeia 'aba'abai e'ouia ediaka, “Vaik-abasi kauna 'ani easi oni lavuaimu elavuai.”

29 Malia luva kanaua eika koanai alimo eko'isi eda'a Iesu kevana.

30 Melala kanaua'i Iesu 'eva asido'o vanuai eda'adodo, ia ua'i Maleta ita devidavali 'abunai emia do'o.

31 Iuda kauta kataua Malia ita lumai demia nuana devakula'ilala kauta ia deikaia alimo eko'isi ela'asi koanai mulinai deda'a, delalovaia ia edada'a mitavai ua'i bekakani.

32 Malia eda'a Iesu emia 'abunai ela'asi inoku eikaia koanai komolonai aena 'olanai epakadivo 'eva ediaka, “Lovia namana e, oni nia'i bomamia koanai lovu'u 'eva sia bemaba.”

33 Iesu Malia ekani eikaia mai Iuda kauta kataua ia ita deasi kauta vaka dekani eikata koanai nuana evilalo mai emanomano.

34 Ia elavuaia ediaka, “A'i oi okoleia?” Ia ena luva devamuea dediaka, “Lovia namana e, mai ikala.”

35 Inoku Iesu ekani.

<sup>36</sup> Iuda kauta dediaka, “Oikaia a elalo'au venia koma.”

<sup>37</sup> Beia ia vaida dediaka, “Kau kanania maka 'ede kauna makana evanama'inata inoku ia be-mata'u Lasalo bai bema'alavua sia bemaba.”

*Iesu Lasalo Bai Evako'isia.*

<sup>38</sup> Iesu nuana evilalo si'asi'a. Inoku eda'a mitava, mitava kanaua 'eva bika'a va'alana ka inoku bika'a namana kai nutualana devaakububua.

<sup>39</sup> Iesu ediaka, “Bika'a oabia tau!” Beia ba kauna lovuna Maleta ediaka, “Lovia namana e, ia 'ani epeda, 'olana ia vali'u 'ani boni ivavanina ikolena.”

<sup>40</sup> Inoku Iesu ia e'ouia ediaka, “Lau 'ani a'oumu, oni boabiveni'u koanai Dilava ena nuavi oi boikala.”

<sup>41</sup> Kanaua 'ounai ia deta'u bika'a deabia tau. Inoku Iesu e'a'a dae ediaka, “Kama'u e, lau avanama'inamu 'olana lele'u 'ani o'ika.

<sup>42</sup> Lau aikabasi oni 'eva melala bounai lele'u o'ika, beia nia'i kau delalava daitai lau luva kanania aluvala. Ia beabiveni 'eva oni ota'u lau osini'u.”

<sup>43</sup> Iesu luva kanania eluvaia mulinai e'ae 'unu'unu ediaka, “Lasalo e, la'asi mai!”

<sup>44</sup> Inoku ba kauna ela'asi easi, imana mai aena 'eva mitava tubu'anai de'umita maivaka vailana tubu'a kai de'umia. Iesu e'outa ediaka, “Mitava tubu'ata oabita ovo inoku ovikania eda'a.”

*Iesu Beakubala Lalovaina*

*Delalovaia.*

*(Mt 26.1-5; Mk 14.1, 2; Lk 22.1, 2)*

<sup>45</sup> Iuda kauta doutamo deasi Malia deikaia kauta 'eva Iesu koa kanaua evavaia deikaia inoku deabivenia.

<sup>46</sup> Beia vaida deda'a Palisea kauta kevatai inoku de'outa Iesu dava evavaia.

<sup>47</sup> Inoku kabukabu kauta namata mai Palisea kauta valuva namana de'imala kauta de'aeta ita dedo'u, "Kau kanaua 'ani vatabulovo koata doutamo evavaita 'eva vali'u ita dava ekavavaia.

<sup>48</sup> Ita ia ekavikania koa katania bevavai 'udai vavai 'udai koanai kau boutai ia beabivenia, inoku Loma kauta be'asi eta lo'e kabukabuna mai eta kanobata bebuku vaita."

<sup>49</sup> Inoku ia banota ka vana Kaiapa, vikau kanaua laloanai ia 'eva kabukabu kauta namata 'olatai kauna ka eko'isi ediaka, "Oi sia dava ka oi oikabasia.

<sup>50</sup> Sia oi olalovaia kau ka'onamo bemaba kau daitai 'eva enama'ina vakaia kanobata itoina besi'avana."

<sup>51</sup> Sia ia sibona ena lalovai ai luva kanania eluvaia, beia vikau kanaua laloanai ia 'eva kabukabu kauta 'olatai kauna dainai, ena enoleai kanaua eluva koma Iesu bebaba Iuda kauta daitai,

<sup>52</sup> sia Iuda kauta mo sibota daitai, beia Dilava nakuna 'abu edeata edeatai demimia kauta vaka bevado'uta mai bevaka'onamota.

<sup>53</sup> Melala kanaua'i eabilamala eda'a laloanai Iuda kauta namata 'eva delovaku Iesu beaku bala.

<sup>54</sup> Kanaua 'ounai Iesu Iuda kauta viloatai sia evaila. Ia eda'a tau eda'a kano'akuna kevanai vanua ka vana Epalaima, ua'i ibanona kauta ita demia.

<sup>55</sup> Iuda kauta eta La'au keini naduna 'ani ekevai laloanai Iuda kauta doutamo vanua edeata edeatai dela'asi deda'a Ielusalemai beva'olu kave'i bekabukabu makava vakaia nadu bepupulu.

<sup>56</sup> Ia Iesu deka'vuia inoku lo'e kabukabuna laloanai delava sibota viloatai devilavu'ai viveni dediaka, "Oi dava olalovaia? Ia nadu dainai 'ani beasi 'o asi'i?"

<sup>57</sup> Beia kabukabu kauta namata mai Palisea kauta luva deveni, kau ka Iesu ena mia 'abuna eik-abasia koanai ia bevaikabasita, ia betata'u belioa.

## 12

*Malia Iesu Aena Deoloai Esisita.*  
(Mt 26.6-13; Mk 14.3-9)

<sup>1</sup> Melala kalakoi vailai demia La'au keini naduna bepupulu 'eva Iesu eda'a Betani, bai evako'isia kauna Lasalo ena vanua.

<sup>2</sup> Iesu iabidaena koana lavilavi ianina ka deva'olua, inoku Maleta 'eva ia da'alata eabi, ia Lasalo mai kau vaida 'eva Iesu ita aniani 'abunai demia.

<sup>3</sup> Inoku Malia eta'u deolo kavapuna ka'onamo tavana namavaikana deolona eabia Iesu aena palapalatai esisia inoku vuinai Iesu aena palapalata eukuta lada. Deolo bonana mediana kanaua luma laloana itoinai ekaolia.

<sup>4</sup> Iesu ibanona kauna ka Iuda Isakaliote kauna muliai Iesu venina beveveni mai kouna bekokou kauna ediaka,

<sup>5</sup> “Dava 'ounai deolo kanania moni namavaikanai sia etavatava vaia inoku monina ta'ovala kauta bemavenita.”

<sup>6</sup> Ia sia ta'ovala kauta elalovaita 'ounai luva kanania eluvaia, beia ia 'eva vinoa kauna, moni iko'unina e'imala kauna, deudala 'ovu davana 'eva eabia ia sibona eduluvaia.

<sup>7</sup> Inoku Iesu ediaka, “Ovikania 'avaea, lau ikole'u bonina dainai deolo kanania eva'olua.

<sup>8</sup> Melala boutai ta'ovala kauta 'eva oi viloamuiiai demimia, beia lau 'eva sia melala boutai oi viloamuiiai bamimia.”

*Lasalo Iakubana Lalovaina  
Delalovaia.*

9 Iuda kauta mato namavaikana Iesu valina deika ia 'eva 'ani Betani ai, inoku deda'a ua'i. Sia Iesu mo sibona beikala, beia Lasalo bai evako'isia 'udai kauna vaka beikala.

10 Kanaua 'ounai kabukabu kauta namata delo-vaku Lasalo vaka beaku bala,

11 'olana Lasalo kevanai koa kanaua epulu 'ounai Iuda kauta doutamo ia devikanita dekeini Iesu deabivenia.

*Iesu Ielusalemai Eda'adodo Itani  
Lovia 'Olana Boina.*

*(Mt 21.1-11; Mk 11.1-11; Lk 19.28-40)*

12 Elani kau mato namavaikana nadu dainai deasi kauta 'ulu deika Iesu 'eva Ielusalema easi venia.

13 Kanaua 'ounai ia vakolo uauata deabi dela'asi deda'a Iesu ita bevidavali, inoku devaoi dediaka, “Osana! Dilava betata'u  
Lovia namana vanai e'asi  
kauna bevanama'inala!  
Dilava betata'u Isalaela eta  
Lovia 'olana bevanama'inala!”

14 Iesu doniki nakuna ka edavalia inoku akanai emia'au. Kanaua 'eva Puka kabukabunai ilelena vitaitana ediaka,

15 “Siona vanuana namana kaumui e,  
sia oi bomakau.  
Oikaia, emui lovia 'olana  
'eva doniki nakuna akanai  
emia'au e'asi.”

Sek 9.9

16 Kanaua melalanai ibanona kauta luva katania ovotai sia deovo eda'amo Iesu ena nuavi ai eko'isi 'udai mulinai vakaia ia lovana deakuia luvata deleta davata mai ia kevanai devavai davata kataua delalota une.

17 Iesu eta'u Lasalo bai evako'isia 'udai deikaia kauta deta'u ia valina dekava odaoda.

18 Kau doutamo dela'asi deda'a Iesu beikala 'olana ia vatabulovo koana kanaua evavaia valina deika 'ounai.

19 Kanaua 'ounai Palisea kauta sibota deviluva viveni dediaka, “Oikaia, ita sia dava ka ekavavaia bedaita, kau boutai 'ani ia mulinai dedada'a.”

*'Elene Kauta Vaida Iesu Dekavuaia.*

20 Nadu kanaua laloanai deda'a Ielusalema Dilava bekukudivo venia kauta kataua vilootai 'eva 'Elene kauta vaka vaida.

21 Ia deasi Kalileiai Betesaida kauna Pilipo kevana de'ouia dediaka, “Loviamu e, lai a'ula Iesu lai baikala.”

22 Pilipo eda'a Andelea e'ouia inoku laluaana deda'a Iesu de'ouia.

23 Iesu eta luva evamuea ediaka, “Lau Kau Nakuna nuavi namana babia melalana 'ani easi.

24 Lau oi luva umauna a'oumui, witi keana ka be'ekoasi kanoai inoku sia bebaba koanai ia keana 'eva 'avaeana mo bemimia. Beia ebaba koanai kea doutamo bevapuluta.

25 Kau ka ena mauli elalo'au venia kauna 'eva ena mauli bevataulea, kanobata kanania'i kau ka ena mauli evaiviivia kauna 'eva ena mauli beabi 'inia beda'amo mauli keinikeini.

26 Lau da'ala'u be'abi kauna 'eva muli'uai bedada'a, inoku lau a'i koanai e'u da'alaabi kauna vaka ua'i. Kama'u betata'u lau da'ala'u e'abi kauna bevanama'inala.

*Iesu Ena Ba Luvana Eluvavaia.*

27 Vali'u lau nua'u 'eva ebavunu si'asi'a inoku luva dava baluvala? Lau badiaka, ‘Kama'u, melala koana kanania laloanai vamauli'u?’ Asi'i. Lau asi 'olana umauna 'eva melala koana kanania'i banana.

<sup>28</sup> Kama'u e, vamu vanuavia.” Inoku vutuvutuai lele ka ediaka, “Lau 'ani avanuavia, maivaka ba-vanuavia 'udai.”

<sup>29</sup> Kau mato ua'i delava lele kanaua deika koanai dediaka, “E'ulua,” vaida dediaka, “Anelu ka Iesu eluva venia.”

<sup>30</sup> Iesu e'outa ediaka, “Lele kanania e'asi 'eva oi bevanama'inamui 'ounai, ia sia lau.

<sup>31</sup> Vali'u melala kanania 'eva kanobata bevalu-vala melalana, inoku kanobata kanania eloviala kauna Satani vali'u belo'oa asi.

<sup>32</sup> Kanobatai lau beabi'u isi koanai kau boutai bavelita be'asi keva'u.”

<sup>33</sup> Ia luva kanania eluvaia 'eva ia a beba koma dalana eluva vaia.

<sup>34</sup> Kau mato dediaka, “Talavatuai luva lai aika ediaka Keliso 'eva bemia keinikeini, oi aboina odiaka, 'Kau Nakuna 'eva beabia isi.' Kau Nakuna kanania 'eva dai?”

<sup>35</sup> Inoku Iesu eta luva evamuea ediaka, “Melala kava'ina mo 'eva 'ailala ita oi bomimia. 'Ailala oi oabia laloanai oda'a, vabuto'o betata'u asi'i ema'alavumui makauna. Vabuto'o laloanai edada'a kauna 'eva sia eikabasi ia a eda'ala.

<sup>36</sup> 'Ailala oi oabia do'o laloanai oabivenia, kanaua'i oi 'eva 'ailala nakunai oi bo'ao.” Iesu eluva koa mulinai kevatai eda'a ovo eda'a epode.

### *Iuda Kauta Doutamo Iesu Sia Deabivenia.*

<sup>37</sup> Iesu vatabulovo koata doutamo vailatai evavai, beia ia sia deabivenia.

<sup>38</sup> Kanania 'eva Isaia enolea kauna ena luva ivamomo'aina kanania eluva koma,  
“Lovia namana e, dai emai luva  
lai aluvaia luvana eabivenia,  
maivaka Lovia namana imana  
siavuna 'eva dai kevanai

bevala'asia?"

Isa 53.1

<sup>39</sup> Kanaua 'ounai kau mato beabiveni 'eva sia edaia, 'olana Isaia vaka eluva vitaitanai ediaka,

<sup>40</sup> “Dilava eta'u makata eva'edeta,  
mai nuata e'alavu,  
asi'i makatai dava demaika  
nuatai demalalovai 'eva demalalo'udai,  
inoku amavanama'inata makauna,  
Dilava kanaua eluva koma.”

Isa 6.10

<sup>41</sup> Isaia luva kanania eluvaia 'olana Iesu ena nuavi eikaia inoku eluvavaia.

<sup>42</sup> Melala kanaua'i Iuda kauta namata doutamo Iesu deabivenia. Beia Palisea kauta makauta demakau 'ounai eta abiveni sia de'ou dae, 'olana Iuda kauta eta lo'eai asi'i demavala'asita makauna,

<sup>43</sup> 'olana ia kau etai akuabalai deula venia vaika vakaia Dilava ena akuabalai.

### *Iesu Ena Luva Betata'u Kau Bevaluvata.*

<sup>44</sup> Inoku Iesu evaoi 'unu'unu ediaka, “Kau ka lau eabiveni'u kauna 'eva sia lau mo eabiveni'u beia esini'u kauna kanaua vaka eabivenia.

<sup>45</sup> Kau ka lau eika'u kauna 'eva lau esini'u kauna kanaua vaka eikala.

<sup>46</sup> Lau 'eva 'ailala boina asi kanobatai, kanaua ounai lau deabiveni'u kauta boutai 'eva sia vabuto'o laloanai bemimia.

<sup>47</sup> Kau ka e'u luva 'uluta e'ika beia sia eabidaeta kauna 'eva lau ia sia bavaluvala. Lau sia kanobata bavaluvala dainai asi beia kanobata bavamaulia.

<sup>48</sup> Kau ka lau sia e'ula veni'u mai e'u luva sia eabita dae kauna 'eva mai ivaluvana kauna ka emimia, melala to'onai aluvavai luvata kataua betata'u ia bevaluvala.

49 'Olana sia lau sibo'u e'u ulai aluluva, beia Kama'u esini'u kauna etata'u e'ou'u luva davana baluvala maivaka aboina baluvala.

50 Inoku lau aikabasi ia ena luva pasisi 'eva bevada'amui mauli keinikeini 'abuna, kanaua 'ounai aluvavai luvata kataua 'eva Kama'u e'ou'u luvata vitaitatai aluvavaita."

## 13

### *Iesu Ibanona Kauta Aeta Edeinita.*

1 Belani 'eva La'au keini naduna, Iesu eikabasi kanobata kanania bevikania beda'a Kamana kevana melalana 'ani edaia. Ia melala bounai kanobatai ia ena kau kauta elalo'au venita, vali'u ia ena lalo'au itoinai bevaikata beda'amo bebaba.

2 Lavilavi deaniani laloanai, diabololo 'ani Simona nakuna Iuda Isakaliote kauna nuana eania Iesu venina beveveni mai kouna bekokou.

3 Iesu eikabasi 'eva Kamana eta'u dava boutai ia ena siavu venunai e'uleta, inoku ia 'eva Dilava enai easi maivaka bemumue beda'a Dilava kevana.

4 Inoku Iesu aniani 'abunai eko'isi, ena iyadodo tubu'ana akanai davana eabia ovo ene'eia divo inoku ikulada tubu'ana eabia kukuanai elioia.

5 Vei nauai elaia uda inoku ibanona kauta aeta edeini makava, ikulada tubu'ana kukuanai elioia tubu'anai aeta eukuta lada.

6 Iesu easi Simona Petelo kevanai ela'asi koanai Petelo ediaka, "Lovia namana e, oni lau ae'u bodeinita, una?"

7 Iesu Petelo ena luva evamuea ediaka, "Vali'u lau dava avavaia davana oni ovonai sia o'ovo, beia beda'a muliai 'eva ovonai 'ani bovo."

<sup>8</sup> Petelo ediaka, “Asi'i, oni lau ae'u sia bodeini kovo.” Iesu enu'ovi ediaka, “Aemu sia badeinita koanai oni 'eva sia lau ibano'u kaumu.”

<sup>9</sup> Simona Petelo ia e'ouia ediaka, “Lovia namana e, sia ae'u mo sibota, beia ima'u mai 'ola'u vaka bodeinita.”

<sup>10</sup> Iesu enu'ovi ediaka, “Kau 'ani eidi'u kauna 'eva kauna itoina 'ani emakamaka inoku aena mo bedeenita. Oi 'eva 'ani oi omakamaka, beia oi ka 'eva asido'o omakamaka.”

<sup>11</sup> 'Olana Iesu eikabasi dai 'eva ia venina beveveni mai kouna bekokou, kanaua 'ounai ia ediaka, “Beia oi ka 'eva asido'o omakamaka.”

<sup>12</sup> Aeta edeeni koa mulinai ena ivadodo tubu'ana eabia evadodoa 'udai. Emue 'abunai emiadio. Ia eta'u elavuaia ediaka, “Lau dava kevamui ai avavaia davana anina oi oikabasi?”

<sup>13</sup> Oi lau o'ae'u emui vaikabasi kau'u mai Lovia namana, kanaua oi oluva koma 'eva ekomolo, 'olana lau 'eva kanaua boi'u.

<sup>14</sup> Inoku lau emui Lovia namana mai emui vaikabasi kau'u 'ani aemui adeenita koanai oi vaka banomui ka ka aeta oi bodeenita.

<sup>15</sup> Lau oi kevamui ai koa kanania avavaia oi oikala koana vitaitanai mo oi bovavaia.

<sup>16</sup> Lau oi luva umauna a'oumui, da'alaabi kauna 'eva ena 'ola kauna sia ekeenia, maivaka veauneke kauna 'eva esinia kauna sia ekeenia.

<sup>17</sup> Vali'u avavai koata katanania anita 'ani oi oikabasita, inoku oi bovavaita koanai Dilava oi bevanama'inamui.

*Iesu Eta'u Ia Venina Beveveni Mai Kouna Bekokou Kauna E'ouia Dae Makava.*

*(Mt 26.20-25; Mk 14.17-21; Lk 22.21-23)*

<sup>18</sup> “Lau sia oi boumui ai lovamui a'aku, lau adilata kauta kataua 'eva aikabasita. Beia Puka

kabukabunai deleleia luvana kanaua 'eva be-momo'aia, 'Laluana palaoa lai ani ka'ona kauna eta'u lau evaiviivi'u.'

<sup>19</sup> Vali'u dava kanania asido'o epupulu laloanai lau oi a'oumui vaika, kanaua 'ounai bepupulu koanai oi boabiveni lau 'eva lau.

<sup>20</sup> Lau oi luva umauna a'oumui, kau ka lau asinia kauna eabia dae kauna 'eva lau eabi'u dae, mai kau ka lau eabi'u dae kauna 'eva esini'u kauna vaka eabia dae."

<sup>21</sup> Iesu luva kanania eluvaia mulinai ia nuana ebavunu inoku eluva asi ediaka, "Lau oi luva umauna mo a'oumui. Oi kaumui ka 'eva lau veni'u beveveni mai kou'u bekokou."

<sup>22</sup> Kanaua 'ounai ibanona kauta sibota deviika viveni sia deikabasi ia 'eva dai lovana eakua.

<sup>23</sup> Ia ibanona kauta ka Iesu ena lalo'au kauna Iesu kevanai emiadivo.

<sup>24</sup> Simona Petelo makana evailu ia kevanai inoku ediaka, 'Lavuaia ia dai lovana eakua.'

<sup>25</sup> Iesu kevanai emiadivo kauna kanaua eilu keke eda'a Iesu kevana elavuaia ediaka, "Lovia namana e, oni dai lovana oakua?"

<sup>26</sup> Iesu ia ena luva evamuea ediaka, "Palaoa kena nau laloanai baudala uku bavenia kauna 'eva kanaua." Inoku Iesu eta'u palaoa eabia nau laloanai eudaia uku inoku Iuda evenia, ia 'eva Simona nakuna Isakaliote kauna.

<sup>27</sup> Komolonai Iuda palaoa eabia eania 'eva Sata-tani ia nuanai edodo. Inoku Iesu Iuda e'ouia edi-aka, "Dava bovavaia davana 'eva vavaia kaokao."

<sup>28</sup> Aniani 'abunai demia kauta sia deikabasi Iesu luva kanaua dava 'ounai ia e'ouia.

<sup>29</sup> Iuda 'eva moni iko'unina e'imaia 'ounai vaidā delalovaia Iesu ia e'ouia nadu dainai dava deula venita davata betatava, 'o dava vaidā ta'ovala kauta bevenita.

<sup>30</sup> Iuda palaoa kena eabia eania mulinai, komolonai eko'isi ela'asi, 'eva 'ani eboni.

*Talavatu Luvana Makamakana.*

<sup>31</sup> Iuda ela'asi eda'a koanai, Iesu ediaka, “Vali'u 'eva lau Kau Nakuna e'u nuavi bela'asi mai lau e'u'ai Dilava ena nuavi vaka bela'asi.

<sup>32</sup> Inoku lau e'u'ai Dilava ena nuavi bela'asi koanai Dilava vaka lau Kau Nakuna e'u nuavi bevala'asia, inoku komolonai mo bevavaia.

<sup>33</sup> Naku'u e, lau 'eva melala kava'ina mo oi ita ekamia. Inoku oi lau bokavu'u. Iuda kauta a'outa vitaitanai vali'u oi a'oumui, lau badada'a 'abuna 'eva sia 'ani oi boda'a.

<sup>34</sup> Lau oi talavatu luvana makamakana avenimui, oi bovilalo'au viveni. Lau oi alalo'au venimui vitaitanai oi vaka oi bovilalo'au viveni.

<sup>35</sup> Oi bovilalo'au viveni koanai, kau boutai beikabasi oi 'eva lau ibano'u kaumui.”

*Iesu Eta'u Petelo Ia Be'oua Avuavu  
Luvana Eluvavaia Makava.*

*(Mt 26.31-35; Mk 14.27-31; Lk 22.31-34)*

<sup>36</sup> Simona Petelo ia elavuaia ediaka, “Lovia namana e, a boda'ala?” Iesu ediaka, “Vali'u lau adada'a 'abuna oni lau muli'u'ai sia 'ani boasi, beia muliai 'eva muli'u'ai bo'asi.”

<sup>37</sup> Petelo elavu'ai ediaka, “Lovia namana e, vali'u mulimu'ai dava 'ounai sia 'ani bavasi? Oni daimuai Lau e'u maui bane'ea divo.”

<sup>38</sup> Inoku Iesu ia ena luva evamuea ediaka, “Lau dai'u'ai oni emu maui bone'ea divo dokadoka, una? Lau oni luva umauna a'oumu, o'oloko asido'o be'alala laloanai oni melala koi lau bo'ou'u avuavu.”

# 14

## *Iesu 'Eva Kamana Kevana Beda'ala Kauta Eta Dala.*

<sup>1</sup> Iesu ediaka, “Nuamui sia oi bovbavunu. Dilava oi boabivenia, lau vaka oi boabiveni'u.

<sup>2</sup> Kama'u ena lumai 'eva mia 'abuta doutamo, bema asi'i koanai lau oi 'ani bama'oumui. Lau bada'a oi emui 'abu ka bava'olua.

<sup>3</sup> Lau bada'a oi emui 'abu ka bava'olua, mulinai bamumue ba'asi bavuumui ekada'a lau a'i bamimia 'eva oi vaka ua'i lau ita ekamia.

<sup>4</sup> Lau badada'a 'abuna dalana 'eva oi 'ani oikabasia.”

<sup>5</sup> Toma Iesu e'ouia ediaka, “Lovia namana e, lai sia aikabasi oni 'abu dava boda'ala, inoku dalana 'eva a lai baikabasia koma?”

<sup>6</sup> Iesu enu'ovi ediaka, “Dala 'eva lau, luva umauna 'eva lau, mai maui vaka lau. Kamata kevana beda'ala kauta boutai eta dala 'eva lau.

<sup>7</sup> Oi lau bomaikabasi'u dokadoka koanai, Kama'u vaka oi bomaikabasia, vali'u vailata beda'ala laloanai ia 'ani oi oikabasia maivaka 'ani oi oikaia.”

<sup>8</sup> Pilipo Iesu e'ouia ediaka, “Lovia namana e, Kamata vaikamai kanaua'i 'eva emai ula bounai bedaia.”

<sup>9</sup> Iesu enu'ovi ediaka, “Pilipo e, lau oi ita 'ani kamia dau'adau'a, beia oni 'eva lau sia oikabasi'u, una? Kau ka lau eika'u kauna 'eva Kama'u 'ani eikaia, oni aboina odiaka, Kamata vaikamai?

<sup>10</sup> Lau 'eva Kama'u nuanai mai Kama'u 'eva lau nua'uai kanaua 'eva sia oabivenia? Aluva venimui luvata katania 'eva sia lau sibo'u e'u ulai aluluva, nia 'eva Kama'u lau nua'uai emimia kauna ena vinaula evavaita.

11 Lau badiaka lau 'eva Kama'u nuanai mai Kama'u 'eva lau nua'uai koanai oi boabiveni'u, asi'i koanai avavaita vinaulata 'outai oabiveni'u.

12 “Lau oi luva umauna mo a'oumui, kau ka lau eabiveni'u kauna 'eva avavaita vinaulata kataua ia vaka bevavai. Mune'e vinaula namata umauta vaka bevavai, 'olana lau adada'a Kama'u kevana.

13 Inoku lau va'uai oi bonoinoi vai davata boutai bavavaita. Kanaua'i Kama'u ena nuavi 'eva bela'asi Nakuna dainai.

14 Lau va'uai dava ka oi bonoinoi vaia 'eva lau batata'u bavavaia.

*Iesu Eluva'ana'i Idume Kabukabuna Besinia Be'asi.*

15 “Bema oi lau bolalo'au veni'u koanai e'u talavatu luvata daitai oi bodadai.

16 Lau batata'u Kama'u banoia inoku Vidulu idumena ka bevenimui, ia 'eva oi ita bemia keinikeini.

17 Ia 'eva luva umauna Idumena Kabukabuna, kanobata kauta 'eva sia 'ani beabiadae 'olana sia deikaia mai sia deikabasia, beia oi 'eva ia oi oikabasia 'olana ia ita oi omimia mai oi nuamuiiai bemimia.

18 “Lau sia bavikanimui 'avaea itani melo sinana kamana asi'i melona boina, lau 'ani bamue basi kevamui.

19 Melala kava'inamo laloanai kanobata kauta 'eva lau sia beika'u 'udai, beia oi 'eva lau oi boika'u, 'olana lau amauli 'ounai oi vaka bomauli.

20 Melala kanaua be'asi laloanai oi bolaloune lau 'eva Kama'u nuanai, oi 'eva lau nua'uai, maivaka lau 'eva oi nuamuiiai.

21 Kau ka lau e'u talavatu luvata eabita dae mai daitai edadai kauna 'eva lau elalo'au veni'u, lau elalo'au veni'u kauna 'eva Kama'u betata'u ia

belalo'au venia. Inoku lau vaka ia balalo'au venia, mai ia kevanai sibo'u bavala'asi'u.”

<sup>22</sup> Iuda beia sia Isakaliote kauna, Iuda edeana ka Iesu elavuaia ediaka, “Lovia namana e, lai mo kevamaiai dava 'ounai bovala'asimu beia kanobata kauta kevatai 'eva sia bovala'asimu?”

<sup>23</sup> Iesu Iuda ena luva evamuea ediaka, “Kau ka lau elalo'au veni'u kauna 'eva e'u vaikabasi luvata daitai bedadai, Kama'u betata'u ia belalo'au venia, maivaka lau Kama'u ita lai ba'asi kevanai ita lai bamimia.

<sup>24</sup> Kau ka lau sia elalo'au veni'u kauna 'eva e'u vaikabasi luvata daitai sia edadai. Luva 'uluta oi o'ika luvata katania 'eva sia lau sibo'u e'u luva beia Kama'u esini'u kauna ena luva.

<sup>25</sup> “Lau oi ita kamimia do'o laloanai dava katania 'ani a'oumui.

<sup>26</sup> Beia Vidulu Idumena Kabukabuna, lau va'uai Kama'u besinia kauna betata'u dava boutai bevaikabasimui, mai a'oumui luvata boutai bevalalomui une.

<sup>27</sup> “Vaka'ona oi kevamuiiai avikania. Lau e'u vaka'ona oi avenimui, vaka'onana 'eva sia kanobata eveveni boina. Nuamui sia oi bovabavunuta mai sia oi bomakau.

<sup>28</sup> Aluluva lele'u 'ani oi oika, Lau 'ani bavikanimui badada'a inoku 'ani bamue'udai basi kevamui. Oi lau olalo'au veni'u koanai, lau adada'a Kama'u kevana 'eva lalomui bemanama 'olana ia 'eva lau ekeini'u vaika.

<sup>29</sup> Lau dava katania vali'u 'ani avaikabasimui makava vakaia muliai bepupulu, kanaua 'ounai depupulu koanai oi 'ani oabiveni'u.

<sup>30</sup> “Lau oi ita sia ekaluvaluva dau'a 'olana kanobata kanania eloviala kauna 'ani e'asi. Ia lau keva'uai ena siavu asi'i,

31 beia kanobata beikabasi, lau 'eva Kama'u alalo'au venia mai Kama'u eluva veni'u davata vitaitatai avavaia. Oko'isi kada'a.”

## 15

### *Iesu 'Eva Vine Auna Umauna.*

<sup>1</sup> Iesu ediaka, “Lau 'eva vine auna umauna, mai Kama'u 'eva vine kulana i'imana kauna.

<sup>2</sup> Ia etata'u lau kau'uai sia devuvua le'eta boutai 'eva ekalata ovo inoku devuvua le'eta boutai 'eva eloleta bemakamaka kanaua'i ia vuata doutamo bevuvua.

<sup>3</sup> Lau oi a'oumui luvata 'outai 'ani oi omakamaka.

<sup>4</sup> Oi lau nua'uai oi bomimia, inoku lau vaka oi nuamuiamimimia. Sia le'e ka sibona 'ani bevua 'avaea, le'e 'eva vine auna akanai belava 'au kave'i 'eva bevuvua. Kanaua vitaitanai mo oi lau kau'uai sia oi bolava 'au kave'i 'eva vuavuamui sia bepupulu.

<sup>5</sup> “Lau 'eva vine auna oi 'eva le'ena. Bema kau ka lau nua'uai emimia, mai lau ia nuana amimia kauna 'eva vuana doutamo bevapuluta, oi lau bovikanu koanaia sia dava ka 'ani oi bovavaia bedaia.

<sup>6</sup> Kau ka lau nua'uai sia bemimia koanaia, ia 'eva vitaitana au le'ena deitua 'au inoku e'ibu boina. Au le'eta kataua boita 'eva devisita, 'alova laloanaia bekapota dodo inoku de'ani.

<sup>7</sup> “Oi lau nua'uai oi bomimia mai e'u luva oi nuamuiamimimia koanaia oi oulavai davata boutai oi bonoinoivai 'eva bevenimui.

<sup>8</sup> Oi vuavuamui bedoutamo lau ibano'u kaumui ai oi bo'ao koanaia Kama'u ena nuavi bela'asi.

<sup>9</sup> Kama'u lau elalo'au veni'u vitaitanai lau vaka oi alalo'au venimui. E'u lalo'au laloanaia oi bomimia.

<sup>10</sup> Lau Kama'u ena talavatu luvata daitai adadai 'ounai ena lalo'au laloanai amimia, vitaitanai oi e'u talavatu luvata daitai oi bodadai koanai, oi vaka lau e'u lalo'au laloanai oi bomimia.

<sup>11</sup> Lau luva kanania 'ani a'oumui kanaua 'ounai e'u lalonama 'eva oi nuamui ai bemimia, kanaua'i emui lalonama 'eva benama vaika.

<sup>12</sup> Lau e'u talavatu luvana 'eva kanania. Lau oi alalo'au venimui vitaitanai banomui ka ka oi bolalo'au venita.

<sup>13</sup> Kau ka ena lalo'au namavaikana ena kau kevatai kauna 'eva ena maui beveneni ia daitai.

<sup>14</sup> Lau a'oumui davana oi bovavaia koanai, oi 'eva lau e'u kau.

<sup>15</sup> Vali'u vailata eda'ala laloanai lau sia ba'aemui 'udai da'alaabi kaumui, 'olana da'alaabi kauna 'eva sia eikabasi ia ena 'ola kauna dava evavaia. Beia lau oi ba'aemui e'u kau, 'olana Kama'u enai aikabasita davata boutai 'ani avaikabasimui.

<sup>16</sup> “Oi lau sia oi odila'u beia lau oi adilamui mai abimui isi oi bodada'a vuavuumui oi bova-pulu, vuavua kataua bemia keinikeini. Inoku lau va'uai oi bonoinoi vaita davata Kama'u betata'u bevenimui.

<sup>17</sup> E'u talavatu luvana 'eva kanania. Banomui ka ka oi bolalo'au venita.

### *Kanobata Kauta Bevaiviivimui.*

<sup>18</sup> “Kanobata kauta bevaiviivimui koanai, oi boikabasi 'eva ia lau devaiviivi'u makava.

<sup>19</sup> Oi kanobata enai oi bo'ao koanai, ia betata'u oi belalo'au venimui vitaitana ia ena umauna. Beia oi 'eva sia kanobata ena. Lau oi kanobatai adilamui kanaua 'ounai kanobata etata'u oi evaiviivimui.

<sup>20</sup> A'oumui luvata oi bolalovai'inita, da'alaabi kauna 'eva ena 'ola kauna sia ekeinina. Lau devaanaana'u koanai, oi vaka bevaanaanamui. Lau

e'u luva daitai bemadai koanai oi vaka emui luva daitai bemadai.

<sup>21</sup> Oi 'eva lau e'u 'ounai koakoa katania keva-mui ai bevavaita, 'olana esini'u kauna sia deikabasia.

<sup>22</sup> “Lau sia bama asi bama'outa koanai ia si'avanai sia bema va'eva. Beia vali'u ia eta si'avanai be'ou to'ato'a dalana 'ani asi'i.

<sup>23</sup> Kau ka lau evaiviivi'u kauna 'eva Kama'u vaka evaiviivia.

<sup>24</sup> Sia kau ka evavai vinalata 'eva lau ia viloatai vinalata sia bama vavai koanai ia si'avanai sia bema va'eva. Beia vali'u vatabulovo koata katania 'ani deikata, inoku lau Kama'u itana, lai lalua na 'eva devaiviivimai do'o.

<sup>25</sup> Beia ia kanania devavaia 'eva eta talavatu pukana laloanai deleleia luvana kanaua bevamomo'aia,  
'Sia mai aninai lau  
devaiviivi'u 'avaea.'

Sal 35.19, 69.4

<sup>26</sup> “Vidulu kauna luva umauna Idumena Kabuk-abuna, Kama'u kevanai be'asi basinia bevasi kele'emui, inoku ia 'eva lau vali'u bekakava.

<sup>27</sup> Oi vaka lau vali'u oi bokakava 'olana oi lau ita makavanai kamia easimo vali'u.”

## 16

<sup>1</sup> Iesu e'outa ediaka, “Lau oi luva katania boutai 'ani a'oumui 'olana 'eva emui abiveni asi'i emataule makauna.

<sup>2</sup> Oi 'eva Iuda kauta eta lo'eai bevala'asimui. Luva umauna, melalana be'asi laloanai oi beaku bamui kauta belalovaia ia 'eva Dilava da'alana de'abi.

<sup>3</sup> Ia oi kevamui ai daya katania bevavai 'olana ia 'eva Kama'u 'o lau sia deikabasimai.

4 Beia lau oi luva katania 'ani a'oumui 'eva melalana be'asi koanai lau avaikabasimui luvata 'ani oi bolalota une.

*Idume Kabukabuna Ena Vinaula.*

“Beia 'ana'inai 'eva sia a'oumui 'olana lau oi ita kamia 'ounai.

5 Beia vali'u lau 'ani adada'a esini'u Dilavana kevana, beia oi sia ka olavu'ai'u odiaka, 'Oni a oda'ala?’

6 'Olana lau oi luva katania 'ani a'oumui 'ounai nuamui 'eva vilaloai evonu.

7 Beia lau oi luva umauna a'oumui, oi emui nama'ina dainai 'eva lau 'ani bada'a tau. 'Olana lau sia badada'a koanai vidulu kauna sia be'asi kele'emui, beia lau badada'a koanai ia basinia be'asi kele'emui.

8 Ia be'asi koanai, kanobata kauta 'eva si'avana, komolo mai Dilava ena valuva dalana sia deikabasia kauta bevaikabasita.

9 Ia si'avana lovana beakua 'olana kau lau sia deabiveni'u.

10 Komolo lovana beakua 'olana lau adada'a Kama'u kevana inoku oi 'ani lau sia oi boika'u 'udai.

11 Valuva lovana beakua 'olana kanobata kania eloviala kauna 'ani valuva eabia mekau evuala 'ounai.

12 “Lau oi luva doutamo bama'oumui, beia vali'u oi bo'abi 'eva sia bedaimui.

13 Beia luva umauna Idume Kabukabuna be'asi koanai, ia betata'u luva umauta boutai laloatai be'ana'ia vaimui. Ia sia sibona ena lalovaiai beluluva, ia kaianai e'ika davana mo beluva vaia mai bepupulu davana oi bevaikabasimui.

14 Ia betata'u e'u nuavi bevala'asia 'olana lau e'u'ai luva be'abi inoku oi bevaikabasimui.

15 Kama'u ena dava boutai 'eva lau e'u. Kanaua 'ounai lau adiaka, Idume Kabukabuna lau keva'uai luva be'abi inoku oi bevaikabasimui.

16 Melala kava'ina mo laloanai oi lau sia boika'u, inoku melala kava'ina mo mulinai 'eva oi lau boika'u.”

### *Vilalo Mai Lalonama.*

17 Ia ibanona kauta vaida sibota viloatai devilavuai viveni dediaka, “Eluluva ediaka, ‘melala kava'ina mo laloanai oi lau sia boika'u, inoku melala kava'ina mo mulinai 'eva oi lau boika'u,’ ‘olana lau 'eva Kama'u kevana ada'ala,’ luva kanaua anina 'eva dava?”

18 Ia sibota devilavuai 'udai 'udai dediaka, “Melala kava'ina mo anina 'eva dava? Ia dava eluvavaia 'eva ita ovonai sia ka'ovo.”

19 Iesu eikabasi ibanona kauta deula belavuuaia 'ounai e'outa ediaka, “E'u luva kanania, ‘melala kava'ina mo laloanai oi lau sia boika'u inoku melala kava'ina mo mulinai oi lau boika'u' 'eva oi sibomui viloamuiiai oi ovilavuai viveni, una?

20 Lau oi luva umauna a'oumui, oi 'eva bokakani mai nuamui bevilalo, laloanai kanobata kauta 'eva belalonama. Oi 'eva nuamui bevilalo, beia emui vilalo 'eva lalonamai be'ao.

21 Ateate ka melo bevapulua koanai eanana 'olana ena mauli bonina 'ani edaia, beia melo 'ani epulu koanai ena anaana ebolabolala ia lalona denanama 'olana melo ka kanobatai 'ani epulu.

22 Vitaitana kanaua boina vali'u 'eva emui vilalo melalana, beia lau 'eva oi baikamui 'udai oi bolalonama, inoku sia kau ka emui lalonama kanaua beabia tau.

23 Melala kanaua be'asi laloanai oi lau keva'uai sia dava ka oi bolavuai vaia. Lau oi luva umauna

a'oumui, lau va'uai dava ka oi bonoinoi vaia 'eva Kama'u betata'u bevenimui.

<sup>24</sup> Lau va'uai sia dava ka oi onoinoi vaia 'ani easimo vali'u. Oi bonoia 'eva bevenimui oi boabia, inoku lalonama nuamui bevavonua.

*Iesu Eta'u Kanobata Ekaokaia.*

<sup>25</sup> “Lau a'oumui luvata boutai 'eva luva ivavitaitatai aluvavai, bonina be'asi laloanai lau oi luva ivavitaitatai sia ba'oumui, beia Kama'u valina bakava kave'i.

<sup>26</sup> Melala kanaua laloanai lau va'uai oi bonoinoi, beia lau sia adiaka 'eva Kama'u banoia oi bedulumui,

<sup>27</sup> 'olana oi lau olalo'au veni'u maivaka lau Dilava kevanai asi 'eva oi ovamomo'ai'u dainai Kama'u sibona oi elalo'au venimui.

<sup>28</sup> Lau Kama'u kevanai asi kanobatai, vali'u kanobata bavikania bamue'udai badada'a Kama'u kevana.”

<sup>29</sup> Inoku ibanona kauta de'ouia dediaka, “Vali'u emu luva 'eva e'ailala kave'i, sia 'ana'inai luva ivavitaitatai oluva boina.

<sup>30</sup> Vali'u lai 'eva oni sia balavuaimu 'udai, inoku 'ani lai aikabasi oni 'eva dava boutai oikabasita, kanaua dainai lai abivenimu oni 'eva Dilava enai oasi.”

<sup>31</sup> Iesu eta luva evamuea ediaka, “Vali'u 'ani oi oabiveni'u, una?

<sup>32</sup> Beia melalana 'eva e'asi, mai 'ani easi, oi boumuiai oi boda'a odaoda, ka ka oi boda'a emui vanua. Lau sibo'u oi bovikani'u. Beia lau 'eva sia sibo'u, 'olana Kama'u 'eva lau ita.

<sup>33</sup> Lau oi luva katania 'ani a'oumui, oi lau ita ekavaka'onamo ai vaka'ona oi boabia. Kanobata kanania'i oi bevaiviivimui, beia oi bovapasisi, lau 'eva kanobata 'ani akaokaia.”

# 17

## *Iesu Ibanona Kauta Mai Abiveni Kauta Boutai Daitai Emeamea.*

<sup>1</sup> Iesu luva kanania eluvaia mulinai, e'a'a dae vutuvutu eikaia inoku emeamea ediaka, “Kama'u e, melalana 'ani edaia nakumu ena nuavi vala'asia, inoku nakumu vaka oni emu nuavi bevala'asia.

<sup>2</sup> 'Olana oni siavu ovenia kau boutai be'ana'ia vaita, oni ota'u ovenia kauta boutai kataua mauli keinikeini bevenita.

<sup>3</sup> Mauli keinikeini 'eva kanania, kau oni beikabasimu, oni mo sibomu 'eva Dilava umaumu, maivaka Iesu Keliso oni osinia kauna beikabasia.

<sup>4</sup> “Vinaula oveni'u bavavaia vinaulana 'ani avaolea, inoku emu nuavi kanobata akanai 'ani avala'asia.

<sup>5</sup> Kama'u e, kanobata asido'o epulu laloanai lau oni ita kamiavaia nuavina kanaua vali'u vailamuai nuavina e'uai vala'asia.

<sup>6</sup> “Kanobatai oveni'u kauta kataua kevatai oni vamu 'ani avaikabasita, ia 'eva oni emu oni ota'u lau oveni'u, inoku ia emu luva dainai dedadai.

<sup>7</sup> Vali'u ia 'ani deikabasi oveni'u davata boutai 'eva oni kevamuai de'asi.

<sup>8</sup> 'Olana o'ou'u luvata ia avaikabasita 'eva deabitadae, inoku deikabasi lau oni kevamuai asi maivaka devamomo'aia oni lau osini'u.

<sup>9</sup> “Lau ia daitai ameamea. Lau 'eva sia kanobata kauta daitai ameamea, beia oveni'u kauta kataua daitai ameamea 'olana ia 'eva oni emu.

<sup>10</sup> Lau e'u dava boutai 'eva oni emu, oni emu dava boutai 'eva lau e'u, inoku ia etai e'u nuavi ela'asi.

<sup>11</sup> “Lau 'eva kanobatai sia bamia dau'a, avavasi oni kevamu, beia ia 'eva kanobatai bemimia do'o. Kama'u Kabukabuna e, oni vamu oveni'u vana

siavunai botautaavu ia beka'onamo vitaitana ita kavaka'onamo boina.

<sup>12</sup> Lau ia ita lai amia laloanai a'imata kave'i oni vamu oveni'u vana siavunai atautaavu. Sia ka etaule, beia betaule kauna ka'onamo mo etaule, puka kabukabuna luvana bevamomo'aia 'ounai.

<sup>13</sup> Lau 'eva vali'u avavasi oni kevamu, beia kanobatai amimia do'o laloanai luva katania aluvavai, ia nuatai e'u lalonama itoina beabia.

<sup>14</sup> “Emu luva 'ani ia avaikabasita inoku kanobata 'eva ia evaiviivita, 'olana lau 'eva sia kanobata ena vitaitanai ia vaka sia kanobata ena.

<sup>15</sup> E'u meamea 'eva kanobatai sia boabita tau beia diabololo kevanai botautaavu.

<sup>16</sup> Lau 'eva sia kanobata ena vitaitanai ia vaka sia kanobata ena.

<sup>17</sup> Emu luva umaunai bovakabukabuta, emu luva 'eva luva umauna.

<sup>18</sup> Oni lau osini'u asi kanobata kauta viloatai amia vitaitanai lau ia asinita deda'a kanobata kauta viloatai demimia.

<sup>19</sup> Ia daitai lau sibo'u avakabukabu'u, ia vaka sibota emu luva umaunai bevakabukabuta.

<sup>20</sup> “E'u meamea 'eva sia ia mo sibota daitai, ia eta luvai lau bevamomo'ai'u kauta kataua vaka daitai ameamea.

<sup>21</sup> Kama'u e, oni 'eva lau nua'uai mai lau 'eva oni nuamuai, vitaitanai ia boutai 'eva nuata beka'onamo. Ia vaka be'asi ita nuatai kanauai kanobata kauta beikabasi oni 'eva lau osini'u.

<sup>22</sup> Nuavi oveni'u nuavina 'eva ia avenita, ita nuata eka'onamo vitaitana ia nuata beka'onamo.

<sup>23</sup> Lau 'eva ia nuatai inoku oni 'eva lau nua'uai. Inoku ia nuata beka'onamo kave'i kanobata kauta bevaikabasita oni 'eva lau osini'u, lau olalo'au veni'u vitaitanai ia vaka olalo'au venita.

<sup>24</sup> “Kama'u e, lau a'ula 'ani oveni'u kauta kataua lau a'i 'eva ia vaka ua'i lau ita, inoku ua'i ia

e'u nuavi oveni'u nuavina kanaua beikala 'olana kanobata asido'o ovavaia laloanai oni lau olalo'au veni'u 'ounai.

<sup>25</sup> Kama'u komolo kaumu e, kanobata kauta 'eva oni sia deikabasimu, beia lau 'eva oni aikabasimu mai muli'uai dedada'a kauta katania deikabasi oni 'eva lau osini'u.

<sup>26</sup> Lau 'eva oni vamu ia avaikabasita maivaka bavaikabasita basibasi, 'olana emu lalo'au kele'e'uai lalo'auna 'eva ia kevatai vaka bemimia, inoku lau vaka ia nuatai bamimia.”

## 18

### *Iesu Deabia Delioia.*

*(Mt 26.47-56; Mk 14.43-50; Lk 22.47-53)*

<sup>1</sup> Iesu ena meamea evaolea koanai ia ibanona kauta ita Kidilona lavanai dekeini deda'a Olive kulana laloanai deda'adodo.

<sup>2</sup> Venina eveni mai kouna ekou kauna Iuda vaka 'abu kanaua eikabasia, 'olana melala doutamo Iesu mai ibanona kauta ita 'abu kanaua'i dedo'u.

<sup>3</sup> Kabukabu kauta namata mai Palisea kauta deta'u lo'e kabukabuna de'imala kauta mai kualii kauta 'itona desinita 'eva Iuda eta'u kau kataua evada'ata deda'a, imata mai 'alovata, mai lamepata maivaka kualii davata deabi kula kanaua laloanai deda'adodo.

<sup>4</sup> Iesu kevanai bepupulu davata boutai 'ani eikabasi, kanaua 'ounai eda'a keke eda'a kevatai elavuaite ediaka, “Oi dai okavua?”

<sup>5</sup> Ia denu'ovi dediaka, “Iesu Nasaleta kauna.” Inoku Iesu ediaka, “Lau kau'u kanania.” Venina eveni mai kouna ekou kauna Iuda vaka ua'i ia ita delava.

<sup>6</sup> Iesu ediaka, “Lau kau'u kanania.” koanai ia delava dua de'eko kanoai denodivo.

<sup>7</sup> Iesu mune'e elavuaia 'udai ediaka, "Oi dai okavua?" Inoku ia deluva 'udai dediaka, "Iesu Nasaleta kauna."

<sup>8</sup> Iesu enu'ovi ediaka, "'Ani a'oumui 'lau kau'u kanania.' Oi lau okavu'u koanai, kau katania oi bovikanita bedada'a."

<sup>9</sup> Kanania epulu 'eva eluvavaia luvana be-momo'ai ediaka, "'Ani oveni'u kauta kataua sia ka avataulea.'"

<sup>10</sup> Simona Petelo 'eva mai ena kuali lepona, inoku evelia asi, kabukabu kauta namata 'olatai kauna ena da'alaabi kauna kaiana idibana epaia ovo. Da'alaabi kauna kanaua vana 'eva Malaku.

<sup>11</sup> Iesu Petelo e'ovenia ediaka, "Kualilepona kanana iudana 'abunai udala. Anaana 'ouna kanania Kama'u eveni'u davana sia bainua, una?"

*Iesu Devuaia Deda'a Ana Kevana.*

<sup>12</sup> Kualikauta eta 'ola kauna ita mai Iuda kauta namata lo'e kabukabuna de'imala kauta ita Iesu deabia delioia,

<sup>13</sup> devuaia makava deda'a Ana kevana, 'olana Ana 'eva Kaiapa lavana. Vikau kanaua'i Kaiapa 'eva kabukabu kauta 'olatai kauna.

<sup>14</sup> 'Ana'inai Kaiapa ena lalovaiai Iuda kauta namata e'outa ediaka, "Nama'ina 'eva kau ka'onamo bemaba kau boutai 'outai."

*Petelo Melala Lava'ana'inanai*

*Iesu E'ouia Avuavu.*

*(Mt 26.69, 70; Mk 14.66-68; Lk 22.55-57)*

<sup>15</sup> Simona Petelo mai Iesu ibanona kauna ka ita Iesu mulinai deda'a. Ibanona kauna kanaua 'eva kabukabu kauta 'olatai kauna eikabasia kave'i 'ounai ia 'eva Iesu mulinai eda'a kabukabu kauta 'olatai kauna ena luma alana laloanai eda'adodo.

<sup>16</sup> Beia Petelo 'eva ua'i nutuala aunai evi'ima, ibanona kauna kanaua kabukabu kauta 'olatai

eikabasia kave'i kauna emue easi nutuala e'imaia vatona e'ouia, inoku Petelo evadodoa ala laloanai.

<sup>17</sup> Nutuala e'imaia vatona kanaua Petelo elavuaia ediaka, “Oni vaka kau kanaua ibanona kaumu ka, una?” Petelo ediaka, “Sia lau.”

<sup>18</sup> 'Elu namavaikana 'ounai da'alaabi kauta mai lo'e kabukabuna de'imaia kauta 'alova detouia kevanai delava kauta devasiavusiavuta. Petelo vaka ia viloatai 'alova enanata.

*Kabukabu Kauta Namata 'Olatai Kauna Eta'u Iesu Elavuaia.*

*(Mt 26.59-66; Mk 14.55-64; Lk 22.66-71)*

<sup>19</sup> Melala kanaua'i kabukabu kauta 'olatai kauna Ana, Iesu kevanai ibanona kauta mai ena vaikabasi luvata elavuai lavuai vaita.

<sup>20</sup> Iesu ia ena luva evamuea ediaka, “Lau 'eva melala bounai kau mato vailatai aluvaluva, lau melala boutai Iuda kauta de'asi deakubou 'abutai ua'i Iuda kauta eta lo'e laloatai mai lo'e kabukabuna laloanai avaikabasi, lau sia luva ka vunivuniai aluvala.

<sup>21</sup> Oni lau dava 'ounai olavuai'u? E'u luva deika kauta kataua bomalavuaia, ia deikabasi lau luva dava aluvaia.”

<sup>22</sup> Iesu kanaua eluva koma koanai ua'i lo'e kabukabuna de'imaia kauna ka eko'isi Iesu vailana epi'aia inoku ediaka, “Kabukabu kauta 'olatai kauna ena luva sia kanaua bovamuea koma.”

<sup>23</sup> Iesu ena luva evamuea ediaka, “Lau aluva va'eva koanai, luvana kanaua luvala asi. Beia lau luva umauna aluvala koanai dava 'ounai opi'a'u?”

<sup>24</sup> Inoku Ana eta'u Iesu imana ido'o 'initai esinia eda'a Kaiapa kabukabu kauta 'olatai kauna kevana.

*Petelo Iesu E'ouia Avuavu.*

(Mt 26.71-75; Mk 14.69-72; Lk 22.58-62)

<sup>25</sup> Simona Petelo 'eva ua'i 'alova kevanai elava enanaia laloanai delavuaia dediaka, “Oni vaka ia ibanona kaumu ka, una?” Ia e'ou avuavu ediaka, “Lau 'eva asi'i.”

<sup>26</sup> Kabukabu kauta 'olatai kauna ena da'alaabi kauna kaiana Petelo epaia ovo kauna kadi'a'ana ka eta'u Petelo elavuaia ediaka, “Oni Iesu ita kula kanaua laloanai aikamui, una?”

<sup>27</sup> Petelo mune'e e'ou avuavu 'udai laloanai, o'oloko komolonai e'alala.

*Iesu Pilato Vailanai.*

(Mt 27.1, 2, 11-14; Mk 15.1-5; Lk 23.1-5)

<sup>28</sup> Iuda kauta namata Kaiapa ena lumai Iesu devala'asia devada'ala deda'a Kavana kauna ena luma namanai. Kavana kauna 'eva Lomai easi. Ua 'eva 'ani taba elele inoku Iuda kauta namata 'eva Kavana ena luma laloanai sia deda'adodo, 'olana ia eta koakoa daitai Dilava vailanai sia be'obu La'au keini naduna laloanai beaniani 'ounai.

<sup>29</sup> Kanaua 'ounai Pilato ela'asi eda'a kevatai elavuaia ediaka, “Kau kanania va'eva dava evavaia 'ounai oi ovuala o'asi keva'u?”

<sup>30</sup> Ia ena luva devamuea dediaka, “Ia si'avana sia bemavavaia koanai sia lai bamavuala bama asi oni kevamu.”

<sup>31</sup> Pilato e'outa ediaka, “Oi sibomui ovuaia oda'a emui talavatu vitaitanai oi bovaluyala.” Iuda kauta namata dediaka, “Lai sia mai siavumai kau ka lai bava bala.”

<sup>32</sup> Kanania epulu 'eva Iesu a beba koma luvana eluvavaia luvana kanaua bemomo'ai.

<sup>33</sup> Pilato luma namanai edodo 'udai inoku Iesu e'aeia, elavuaia ediaka, “Oni Iuda kauta eta lovia 'olana, una?”

<sup>34</sup> Iesu ia ena luva evamuea ediaka, “Oni sibomu emu lalovaiai lavuai kanana oluvala, 'o kau vaidai oni kevamuai lau lova'u deakuia luvana oluva vaia?”

<sup>35</sup> Pilato Iesu ena luva evamuea ediaka, “Inoku oni olalovaia lau 'eva Iuda kau'u? Oni emu kau umauta mai kabukabu kauta namata oni devuamu deasi keva'u. Oni va'eva dava ovavaia?”

<sup>36</sup> Iesu enu'ovi ediaka, “E'u lovia vanuana 'eva sia kanobata kanania enai. Bema e'u lovia vanuana kanobata kanania enai koanai, e'u kau dai'uai bemaviaku, Iuda kauta namata imatai bemava-mauli'u, beia e'u lovia vanuana 'eva sia kanobata kanania'i.”

<sup>37</sup> Pilato ia elavuaia ediaka, “Oni 'eva lovia 'olana ka, una?” Iesu ia ena luva evamuea ediaka, “Luvana mo kanana 'ani oluvala, lau 'eva lovia 'olana ka, lau apulu asi kanobatai 'olana 'eva luva umauna bavala'asia. Luva umaunai demimia kauta 'eva lau lele'u be'ika.”

<sup>38</sup> Pilato elavuaia ediaka, “Luva umauna 'eva dava?”

Kanaua eluva koma, inoku ela'asi 'udai eda'a Iuda kauta namata e'outa ediaka, “Kau kanania keyanai sia va'eva ka adavalia.

<sup>39</sup> Oi emui koakoa daitai La'au keini naduna bonina edaia koanai vabuto'o kauna ka avala'asia. Inoku oi o'ula Iuda kaumui emui lovia 'olana bavala'asia, una?”

<sup>40</sup> Inoku ena luva vaoiai devamuea dediaka, “Asi'i. Sia ia. Lai a'ula Balaba bovenimai.” Balaba 'eva abi'avaea kauna.

## 19

*Pilato Eluva Iesu Au Ido'o Valaukuna Akanai Beaku Bala.*

*(Mt 27.15-31; Mk 15.6-20; Lk 23.13-25)*

<sup>1</sup> Pilato kuali kauta luva evenita Iesu deabia devuaia deda'a de'odia.

<sup>2</sup> Kuali kauta 'ini auma ilo'una ia 'olanai deva'olala, maivaka tubu'a 'aolana ka ia devavadodoia.

<sup>3</sup> Inoku kevanai delava basia dediaka, “Iuda kauta eta Lovia 'olana e, bomauli keinikeini!” Inoku vailana depi'aia.

<sup>4</sup> Pilato mune'e ela'asi, Iuda kauta namata e'outa ediaka, “Kaiamui ovaala, lau batata'u oi vailamui ai ia bavala'asia kanaua'i oi boikabasi ia kevanai sia va'eva ka adavalia kovo.”

<sup>5</sup> Inoku Iesu ela'asi koanai 'olanai 'ini auma ilo'una e'olaia mai kaunai tubu'a 'aolana ivavadodona. Pilato e'outa ediaka, “Kau kanania oikaia.”

<sup>6</sup> Kabukabu kauta namata mai lo'e kabukabuna de'imala kauta Iesu deikaia koanai devaoi dediaka, “Au ido'o valaukuna akanai oaku bala, au ido'o valaukuna akanai oaku bala!” Pilato ia e'outa ediaka, “Oi sibomui oabia, au ido'o valaukuna akanai oi boaku bala, 'olana lau ia kevanai sia va'eva ka adavalia.”

<sup>7</sup> Iuda kauta namata ia ena luva devamuea dediaka, “Lai 'eva mai emai talavatu. Talavatu kanaua vitaitanai ia 'eva bebaba, 'olana ia sibona Dilava nakunai evaaoa.”

<sup>8</sup> Pilato lele kanaua eika koanai emakau si'asi'a,

<sup>9</sup> inoku ena vinaula lumanai eda'adodo 'udai, Iesu elavuaia ediaka, “Oni a'i oasi?” Beia Iesu sia luva ka eluvaia.

<sup>10</sup> Pilato ediaka, “Oni okokono mo sia boluva veni'u, una? Oni sia oikabasi lau 'eva mai e'u siavu oni baluvumu 'o au ido'o valaukuna akanai baku bamu?”

<sup>11</sup> Iesu ia ena luva evamuea ediaka, “Dilava oni siavu sia bemavenimu koanai oni lau boaku

ba'u siavuna 'eva kevamuai bema asi'i. Kanaua 'ounai oni imamuai euda'u 'ovu kauna kanaua ena si'avana 'eva oni emu si'avana ekeinia.”

<sup>12</sup> Melala kanaua'i Pilato dala ekavu Iesu beluvua. Beia Iuda kauta namata devaoi basibasi dediaka, “Kau kanana boluvua koanai oni 'eva sia lovia 'olana Kaisala ena kau. Kau ka ia sibona lovia 'olanai evaaoa kauna 'eva Kaisala ena 'ou kauna.”

<sup>13</sup> Pilato luya kanania eika koanai Iesu evala'asia, inoku ia 'eva ena valuva 'abuna mia'aunai emia divo, 'abu kanaua vana de'aeia 'eva 'bika'a palapalana', 'Ebelu leletai vana 'eva 'Kabata'.

<sup>14</sup> Melala kanaua 'eva La'au keini naduna iva'oluna kave'i melalana, melala 'eva 'ani eado'alavuni, Pilato Iuda kauta e'outa ediaka, “Emui lovia 'olana kanania oikaia.”

<sup>15</sup> Ia devaoi dediaka, “Oaku bala, oaku bala, au ido'o valaukuna akanai oaku bala!” Pilato elavuaite ediaka, “Oi o'ula emui lovia 'olana kanana au ido'o valaukuna akanai baku bala?” Kabukabu kauta namata deluva dediaka, “Lai sia mai emai lovia 'olana kauna ka, Kaisala mo sibona.”

<sup>16</sup> Inoku Pilato eta'u Iesu kuali kauta imatai eudaia au ido'o valaukuna akanai beaku bala.

*Iesu Au Ido'o Valaukuna  
Akanai Dekokoia 'Au.*

*(Mt 27.32-44; Mk 15.21-32; Lk 23.26-43)*

Inoku kuali kauta Iesu devada'ala devuaia deda'a.

<sup>17</sup> Iesu sibona ena au ido'o valaukuna evuaia deda'a 'abu ka vana “Ola kuliana”, 'Ebelu leletai 'eva 'Kolokota'.

18 Kanaua'i Iesu au ido'o valaukuna akanai dekokoaia 'au, kau lua vaka ia ita dekokota 'au, ka avekenai ka avekenai, Iesu 'eva bo'adatai.

19 Pilato eta'u malele ka ua'i au ido'o valaukunai eakuia 'au, kanania eleleia koma, 'IESU NASALETA KAUNA, IUDA KAUTA ETA LOVIA 'OLANA.'

20 Iuda kauta doutamo malele kanaua devakua, 'olana Iesu dekokoaia 'au 'abuna mai Ielusalema vanuana viloata 'eva sia edau'a. Maiyaka malele kanaua 'eva 'Ebelu leletai, Loma leletai mai 'Elene leletai deleleia.

21 Inoku Iuda kauta eta kabukabu kauta namata Pilato de'ouia dediaka, “‘Iuda kauta eta Lovia 'olana’ sia bomalelea. Beia kanania boina bomalelea, ‘Kau kanania sibona ediaka, Lau 'eva Iuda kauta eta Lovia 'olana.’ ”

22 Pilato eta luva evamuea ediaka, “‘ani aleleia 'au davana kanaua boina mo bemimia.”

23 Kualu kauta Iesu dekokoaia 'au mulinai ena tubu'a deabia de'idia vitavani ka ka si'ata deabi. Ia ena tubu'a ivadodo laloanai tubu'ana 'eva sia ikuli 'inina, itoina 'eva akai dekulia easimo venuai.

24 Kualu kauta sibota deluvaluva dediaka, “Sia eka 'idia beia punipuniai ekaikabasi dai beabia.” Kanania epulu koma 'eva Puka kabukabunai deleleia luvana kanaua bemomo'ai luvana ediaka,

“Ia e'u tubu'a dekoleia,  
e'u ivadodo 'eva depunipuni vaia”

Sal 22:18

Kanaua 'ounai kualu kauta 'eva kanania devavaia koma.

25 Au ido'o valaukuna kevanai delava 'a'ateta 'eva Iesu sinana mai sinana kadina, inoku Kolopa adana Malia mai Malia Makadala ateatena.

26 Iesu ia sinana mai ibanona elalo'au venia kauna ua'i delava eikata koanai, sinana e'ouia ediaka, "Sina'u e, nakumu kanana."

27 Ibanona kauna kevanai vaka e'ouia ediaka, "Lele'u ika, sinamu kanana." Melala kanaua'i ibanona kauna kanaua eta'u Malia evada'ala deda'a ena lumai demia.

### *Iesu Ena Ba.*

*(Mt 27.45-56; Mk 15.33-41; Lk 23.44-49)*

28 Kanaua mulinai Iesu eikabasi vinaula boutai 'ani evaoleta, inoku Puka kabukabuna luvana bevamomo'aia 'ounai ediaka, "Vei ba'u aba."

29 Vodu ka ua'i vine veina vaimana devavonua, inoku dapulu ka deabia vine veina vaimana laloanai dekaeia uku, vakaia siliboai dedo'oia 'au, deisia 'au eda'a Iesu bibi'anai.

30 Iesu vine veina vaimana einuia mulinai ediaka, "Ani eole." Inoku 'etuna elo'easi, eba vaika.

### *Iesu Duluna Dekosisia.*

31 Vali'u 'eva va'olu kave'i melalana inoku mala 'eva La'au keini naduna, ba kauta ua'i au ido'o valaukuna akanai bemimia beda'amo mala 'eva sia benama'ina 'ounai, Iuda kauta namata Pilato denoia, au ido'o valaukuna akanai dekokota 'au kauta aeta kuliata beaku mokuta inoku kauanita beabita ovo.

32 Kuali kauta deda'a Iesu ita dekokota 'au kauta kevatai, inoku kau lava'ana'ina aena kuliata devamoku, mune'e deda'a banona ka kevanai aena kuliata devamoku.

33 Beia deda'a Iesu kevanai deikaia 'ani eba 'ounai aena kuliata sia devamoku.

34 Kuali kauna ka eta'u Iesu duluna ioai ekoia ulu, komolonaimo lala mai vei de'itabu ka'ona.

<sup>35</sup> Makanai eikaia kauna 'ani valina ekava, inoku ia ena vali kava 'eva momo'aina, ia eik-abasia 'eva luva umauna eluvala, inoku oi ia eva-momo'aia davana oi boabivenia.

<sup>36</sup> Koa kanania epulu 'eva Puka kabukabuna luvana evamomo'aia ediaka,  
 “Sia kuliana ka devamokua kovo”.

Ex 12: 46, Num 9: 12, Sal 34: 20

<sup>37</sup> Puka kabukabuna kai mune'e ediaka,  
 “Duluna dekoia ulu kauna  
 'eva kau beikala.”

*Iesu Kauanina Dekoleia.*

*(Mt 27.57-61; Mk 15.42-47; Lk 23.50-56)*

<sup>38</sup> Iosepa Alimatea kauna vaka Iesu ibanona kauna ka, beia vunivuniai 'olana Iuda kauta namata makauta emakau. Dava kataua mulitai ia eda'a Pilato kevanai enoia Iesu kauanina beabia ovo. Inoku Pilato ena luvai Iosepa eda'a Iesu kauanina eabia ovo.

<sup>39</sup> Nikodemo 'ana'inai boni ka eda'a Iesu kevana kauna vaka Iosepa ebanoia nopa mai 'aloe mulamula bonata kula'ilata lua deula venita mulamulata eabi eda'a, ena mekau 'eva kiloglam koinavui (30) boina.

<sup>40</sup> Inoku kauta laluaana Iesu kauanina deabia mulamulai deto'aia mai tubu'a nama'ina ba kauta de'umita tubu'anai de'umia, Iuda kauta eta ba kauta devavaita kave'i vinalana vitaitanai devavaia.

<sup>41</sup> Iesu au ido'o valaukuna akanai dekokoa 'au 'abuna kevanai 'eva kula ka, kula kanaua laloanai mitava makamakana ka 'eva asido'o ba kauna ka dekoieia.

<sup>42</sup> Inoku Iesu ua'i dekoieia, 'olana mitava kanaua 'eva ekevai maiyaka melala kanaua 'eva La'au keini naduna iva'oluna kave'i melalana.

## 20

### *Iesu Bai Eko'isi 'Udai.*

*(Mt 28.1-8; Mk 16.1-8; Lk 24.1-12)*

<sup>1</sup> Masi melalana 'avu'avuni vabulanai Malia Makadala ateatena eda'a mitava beikala, ekailao 'uli de'alavua bika'ana 'ani deabia tau eikaia.

<sup>2</sup> Ia eveau emue'udai eda'a Simona Petelo mai ibanona ka Iesu elalo'au venia kauna kevatai e'outa ediaka, “Lovia namana mitavai 'ani deabia tau, lai sia aikabasi a'i dene'eiadivo.”

<sup>3</sup> Petelo mai ibanona kauna ka deko'isi deda'a mitava.

<sup>4</sup> Laluana deveau ka'ona deda'a beia banona eta'u Petelo eveau kania e'ana'ia eda'a mitava.

<sup>5</sup> Beia sia edodo, ia 'uli nutualanai ekai dodo, tubu'a nama'ita kanoai deno tubu'ata eika.

<sup>6</sup> Simona Petelo muliai eveau easi komolonai eda'a mitava 'ulina laloanai edodo, tubu'a nama'ita deno tubu'ata eika.

<sup>7</sup> Maivaka tubu'a ka Iesu 'olana de'umia tubu'ana 'eva sia tubu'a nama'ita ita deno ka'ona, beia ilo'u kave'ina 'abu edeanai eno.

<sup>8</sup> Kanaua laloanai ibanona ka mitavai ela'asi makava kauna edodo eda'a eikata inoku eabiveni.

<sup>9</sup> Beia Puka kabukabuna luvana asido'o ovonai deovo luvana ediaka 'Ia 'eva bai beko'isi 'udai'.

### *Iesu 'Eva Malia Makadala*

*Ateatena Kevanai Evaila.*

*(Mt 28.9, 10; Mk 16.9-11)*

<sup>10</sup> Inoku ibanona kauta lua demue deda'a eta luma.

<sup>11</sup> Malia 'eva mitava kevanai elava ekani, ekani laloanai enovo dodo mitava laloana eikaia.

<sup>12</sup> Inoku ia anelu lua tubu'a deva'ita devadodota eikata, Iesu kauanina dene'eia divo 'abunai demia, ka 'eva aena duasi ka 'eva 'olana duasi.

13 Ia delavuaia dediaka, “Ateate e, dava 'ounai okakani?” Ia enu'ovi ediaka, “E'u Lovia namana 'ani deabia tau, sia aikabasi a'i dene'ea divo.”

14 Kanaua eluva koma inoku elava 'udai 'eva Iesu ua'i elava eikaia, beia sia eikabasi ua 'eva Iesu.

15 Iesu ia elavuaia ediaka, “Ateate e, dava 'ounai okakani? Dai okavua?” Malia elalovaia ia 'eva kula i'imana kauna ka, inoku ediaka, “Loviamu e, oni ia ovuaia oda'a a'i one'eia divo 'eva lau vaikabasi'u. Inoku lau bada'a babia.”

16 Iesu e'aeia ediaka, “Malia e!” Malia elava 'udai inoku 'Ebelu lenenai ediaka, “Laboni!” (Luva kanania anina 'eva vaikabasi kauna)

17 Iesu Malia e'ouia ediaka, “Sia boabi'u kovo, 'olana asido'o aele'au Kama'u kevana. Beia boda'a bo'akala'u bo'outa, lau 'eva baele'au lau Kama'u mai oi Kamamui maivaka e'u Dilava mai emui Dilava kevana bada'ala.”

18 Inoku Malia Makadala ateatena eda'a ibanona kauta e'outa ia Lovia namana eikaia, mune'e Iesu luva eluvata luvata ia e'outa.

### *Iesu Ibanona Kauta*

#### *Kevatai Evaila.*

*(Mt 28.16-20; Mk 16.14-18; Lk 24.36-49)*

19 Melala ka'onamo kanaua'i melala 'ani eulu laloanai, ibanona kauta boutai 'abu ka'onamoai deakubou, luma nutualata de'alavuta, 'olana Iuda kauta namata makauta demakau. Inoku Iesu eda'a viloatai elavadivo e'outa ediaka, “Nua'elu kevamui ai bemimia.”

20 Luva kanania eluvaia mulinai imana luana mai duluna evaikata. Ibanona kauta Lovia namana deikaia koanai delalonama si'asi'a.

21 Iesu mune'e e'outa ediaka, “Nua'elu kevamui ai bemimia. Kama'u lau esini'u vitaitanai, lau vaka oi asinimui.”

22 Kanaua eluva koma mulinai ladaena epululuta, ediaka, “Idume Kabukabuna oabia.

23 Kau eta si'avana oi bo'ou kao koanai eta si'avana 'eva i'ou kaota, beia eta si'avana sia oi bo'ou kao koanai eta si'avana 'eva sia i'ou kaota.”

### *Toma Iesu Eikaia.*

24 Ibanona kauta 'ouka lua ka vana Toma, de'aea vi'apala, Iesu do'u kanaua kevatai eda'a dodo boninai 'eva ia sia ua'i vilodatai.

25 Ibanona kauta vaida ia de'ouia dediaka, “Lai Lovia namana lai aikala.” Beia Toma ediaka, “Lau ikoko loita imanai ba'ika mai ima'u li'uli'uta ikoko 'abutai baisi dodo, mune'e ia dulunai ima'u baisia dodo, bema asi'i koanai lau 'eva ia sia babivenia.”

26 Masi ka eole mulinai ibanona kauta luma laloanai dedo'u 'udai, Toma vaka ua'i ia ita. Nutu-ala de'alavu 'inia. Beia Iesu 'eva eda'a ia vilodatai elavadivo ediaka, “Nua'elu kevamui ai bemimia.”

27 Inoku ia Toma e'ouia ediaka, “Imamu li'uli'una emai ima'u kanania abia kovo, maivaka imamu emai dulu'u ai isia dodo, inoku nuamu sia belalo to'ato'a beia boabiveni'u.”

28 Toma Iesu ena luva evamuea ediaka, “Oni 'eva e'u Lovia namana, lau e'u Dilava!”

29 Iesu ia e'ouia ediaka, “Oni oika'u 'ounai oabiveni'u. Sia deika'u beia deabiveni'u kauta kataua 'eva denama'ina.”

### *Puka Kanania 'Olana.*

30 Iesu vatabulovo koata doutamo ibanona kauta vailatai evava'i davata 'eva puka kanania laloanai sia aleleta 'au.

31 Beia katanania aleleta 'olana 'eva oi boabiveni Iesu 'eva Keliso, Dilava Nakuna. Inoku ia oi boabivenia 'eva vanai maui oi boabia.

## 21

### *Iesu Ibanona Kauta Kalakoi Ka Kevatai Evaila.*

<sup>1</sup> Kanaua mulinai, Iesu Tibelia 'ovunai ibanona kauta kevatai ela'asi 'udai, kanania ela'asi koma.

<sup>2</sup> Simona Petelo, Toma de'aea vi'apala, Natanaela Kalileai Kana kauna, Sebedeo nakuna luana, mai ibanona kauta lua vaka ua'i ita 'abu ka'onamoai demia.

<sup>3</sup> Simona Petelo eta'u ia e'outa ediaka, "Lau 'ani adada'a bava'eka." Ia dediaka, "Lai vaka oni ita ekada'a." Deda'a asiai dele'au, beia boni kanaua laloanai 'eva sia sisi ka devakoala.

<sup>4</sup> Taba elele laloanai Iesu 'eva nabuai elava, beia ibanona kauta sia deikabasi ua 'eva Iesu.

<sup>5</sup> Inoku Iesu elavuaia ediaka, "E'u kau e, sisi ka oi ovakoala?" Ia denu'ovi dediaka, "Dava asi'i."

<sup>6</sup> Iesu mune'e e'outa ediaka, "Emui vuo asi idibana duasi onaia, inoku sisi vaidā 'ani oi bo-vakoata." Kanaua devavaia koanai vuo bevelia 'au 'eva sia edaita, 'olana sisi doutamo vaika.

<sup>7</sup> Inoku Iesu ibanona kauna elalo'au venia kauna kanaua eta'u Petelo e'ouia ediaka, "Ua 'eva Lovia namana." Simona Petelo 'eva ena tubu'a evadada ovo eva'eka, inoku luva kanania eika 'Ia 'eva Lovia namana' koanai eko'isi ena tubu'a elioia komolonai veiai elovo uku.

<sup>8</sup> Ibanona kauta vaidā 'eva asiai vuo sisiai evonu vuona develia 'ovu deda'a nabua, 'olana nabua 'eva sia edau'a, lova sinavu ka boina.

<sup>9</sup> Ia nabuai dele'au koanai dekailao 'alova 'itana akanai sisi ine'e'auta deikata, palaoa vaidā vaka ua'i.

<sup>10</sup> Iesu ia e'outa ediaka, "Vali'u oi oakuta sisita vaidā oabi omai."

11 Simona Petelo emue'udai asiai ele'au vuo evelia 'au nabuai, vuoai sisi namata mo 'avaeana boutai sinavu ka imanavui koi (153), sisi namata 'avaeana beia eta vuo 'eva sia e'idi.

12 Iesu ia e'aeta ediaka, “Omai oaniani!” Inoku ibanona kauta sia deula belavuaia bediaka, ‘Oni dai?’ ‘olana 'ani deikabasia ia 'eva Lovia namana.

13 Iesu eda'a palaoa eabia inoku evenita, maivaka sisi vaka kanaua evavaia koma.

14 Kanania 'eva Iesu bai eko'isi 'udai mulinai melala ivakoina ia ibanona kauta kevatai evaila.

### *Iesu Mai Petelo.*

15 Deaniani koa mulinai Iesu Simona Petelo elavuaia ediaka, “Simona Ioane nakuna e, oni momo'ai lau olalo'au veni'u vaika vakaia vaida katania eta lalo'au, una?” Petelo ediaka, “O, Lovia namana, oni oikabasi lau oni ulamu a'ula.” Inoku Iesu ediaka, “E'u mamoe nakuta bovananita.”

16 Melala ivaluana elavuai 'udai ediaka, “Simona Ioane nakuna e, oni lau olalo'au veni'u, una?” Petelo ediaka, “O, Lovia namana, oni oikabasi lau oni ulamu a'ula.” Inoku Iesu ediaka, “E'u mamoe bo'imata kave'i.”

17 Iesu melala ivakoina Petelo elavuaia ediaka, “Simona Ioane nakuna e, oni lau olalo'au veni'u, una?” Petelo nuana eanana 'olana 'ani melala ivakoina elavuaia ediaka, “Oni lau ula'u o'ula?” Petelo ediaka, “Lovia namana e, oni 'eva dava boutai oikabasita, oni oikabasi lau oni ulamu a'ula.” Iesu ediaka, “E'u mamoe bovananita.

18 Lau oni luva umauna a'oumu, 'alu'alumu koanai oni sibomu tubu'amu ovadodo maivaka oulavenia 'abuna 'eva oda'ala. Beia bomomotu koanai imamu boisi pailolo, kau ka betata'u tubu'amu bevavadodomu, bevumu sia oula venia 'abuna boda'ala.”

19 Iesu luva kanania eluvaia 'eva Petelo a beba koma Dilava ena nuavi bevala'asia beikala. Inoku e'ouia ediaka, "Mai muli'uai da'a."

*Iesu Ibanona Elalo'auvenia Vaika  
Kauna Ena Luva.*

20 Petelo ekai 'udai 'eva Iesu ibanona elalo'au venia kauna mulitai eda'a eikaia, ia 'eva ani bouai Iesu kaunai ekabe'au, inoku elavuaia ediaka, "Lovia namana e, dai oni venimu beveveni mai koumu bekokou?"

21 Petelo kau kanaua eikaia koanai Iesu elavuaia ediaka, "Lovia namana e, kau kanaua 'eva a beko?"

22 Iesu eta'u Petelo e'ouia ediaka, "Bema lau ba'ula ia bemimia beda'amo lau bamue'udai ba'asi, beia oni kevamuai kanaua 'eva dava? Oni 'eva mai muli'uai da'a."

23 Luva kanania 'ounai ibanona kauta sibota viloatai deluvaluva vaia dediaka, ibanona kauna kanaua sia bebaba. Beia Iesu 'eva sia ediaka kau kanaua sia bebaba, ia ediaka, "Bema lau ba'ula ia bemimia beda'amo lau bamue'udai ba'asi, beia oni kevamuai kanaua 'eva dava?"

24 Ibanona kauna kanaua eta'u luva katania boutai e'ou asi maivaka eleleta, inoku ita kaikabasi luva katania eluva vaita luvata 'eva umauta.

25 Iesu 'eva koa doutamo vaika evavai. Lau alalovaia kataua boutai ka'o ka'o demalele 'au koanai, kanobata itoina puka katania bemadoubou 'eva sia bedaia.

**Luva'ana'i Namana Makamakana**  
**The New Testament in the Nara language of Papua**  
**New Guinea**  
**Nupela Testamen long tokples Nara long Niugini**

copyright © 2024 Global Bible Translators

Language: Nara (Lala)

Dialect: Nara

Translation by: GBT

Contributor: SIL Papua New Guinea and Namseul Presbyterian Church in South Korea

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2024-08-29

---

PDF generated using Haiola and XeLaTeX on 3 Sep 2024 from source files dated 29 Aug 2024

f0f11a93-ea2f-5af2-b48b-3653b522a3fb